

摘藻堂四庫全書薈要

集部

欽定四庫全書薈要

集部

陵川集卷八至
十

詳校官助教臣謝登雋



欽定四庫全書薈要卷一萬六千一百二十四

集部

陵川集卷八

元 郝經 撰

歌詩

白溝行

西風易水長城道老寧查牙馬頻倒岸淺橋橫路欲平
重向荒寒問遺老易水南邊是白溝北人為界海東頭
石郎作帝從珂敗便割燕雲十六州世宗恰得關南死

點檢陳橋作天子漢兒不復見中原當日禍基元在此
溝上殘城有遺堞歲歲遼人來把截酒酣踏背上馬行
彎弧更射溝南月孫男北渡不敢看道君一向何曾還
誰知二百年冤孽移在江淮蜀漢間歲久河乾骨仍滿
流禍無窮都不管晉家日月豈能長當時歷數從頭短
日暮途窮更著鞭百年遺恨入荒烟九原重怨桑維翰
五季那知魯仲連只向河東作留守奉詔移官亦何疚
稱臣呼父古所無萬古諸華有遺臭

賢臺行

古黃金臺也土人稱為賢臺

高臺突兀燕山碧黃金泥多土猶濕曉日瞳矓赤羽旗
燕王北面親前席費盡黃金臺始成一朝拜隗人盡驚
誰知平地幾層土中有金齊七十城禮賢復讎燕始霸
遂與諸侯雄並駕七百年來不用兵一戰轟然駭天下
二城未了昭王殂火牛突出騎劫誅臺上黃金少顏色
惠王空讀樂毅書古來燕趙多奇士用舍中間定興廢
還聞趙括代廉頗敗國亡家等兒戲燕子城南知幾年

臺平樹老漫荒烟莫言騏驎能千里祇重黃金不重賢

古菱花鏡詞

燧人燒殺太古月化為片銅藏死魄噓光沈曜解反照
黑潭萬丈生虛白蛟龍遯去不敢藏高秋無波更澄徹
徑圍數尺透膽寒一身忽入空明穴背紐深嵌邊如刀
週圍菱花纏枝葉毫髮紫回印水紋朱砂翡翠編鱗甲
不知世上幾千年依舊團團無壞缺百煉得道遂不化
又作鑪中一太極寢揚寧陋各成形焉用區區強裝貼

一略精神隨臭腐眼前脂粉墓中血菱花鏡裏都無物
瑩淨圓平本顏色等閒棄擲清苔蘚未免昏翳人不識
忽為磨洗開玉井孤電繞手明月壁部屋裏開有神物
挂向青天照白日皦然盡見不欺人魑魅魍魎焉敢出
壽福蓮花空自名不須倒影尤奇絕

藜杖行家君命作

荒藜一兩青牆隅數莖扣深勢扶疎柯葉張磔忽過墻
赤絲綰結綠珊瑚雨餘霜重凋傷後瑩節高肥榦枯瘦

斷截為杖勁且堅黃玉壓手光欲透更將月漬晞朝曦
潤滑隱隱分細紋家君垂老添數僕馮藉耆月復穿雲
倚床半夜風雨怒只恐飛騰作龍去乃為作詩重相告
從吏少陵桃杖句天生此杖向吾家再起衰宗振國華
會當拄到太行頂指點千年墓上花剗除蕪穢重洒掃
橫膝琅琅過庭教措傾拄壞植孔孟永使子孫扶聖道

蔡江月歌

郎山五季稱孫姑兵家洞達握化樞遂令方諫擁節旄

南振趙魏北燕都爾來燕南道術高往往卓犖動星閭

晚金乃有蔡江月採桑神授青衣書歸來丫髮辭姑嫜

脫去怱怱投釵梳便向牀頭尋紙筆揮洒萬字紛瓊琚

夫婿瞠視不敢詰鄰里環矚皆駭吁為言諸人當避兵

西山岡頭是我居未幾雲衆四遠集豪傑望風皆奔趨

指授方畧無不中權謀每笑孫吳踈嘗將勲業論諸將

指示張公都不如名高兩受紫泥詔道重六屈金虎符

留道澗賈瑀靖安民張甫武仙今萬戶張公事平笑傲
皆嘗師事之金宣宗下詔賜號江月真人

作天仙綠眉粉面堆翠鈿絳襦青帔玉冠佩插花吟諷
香雲纏繡帷深處說黃庭碧桃隱映燒丹煙篇章不似
婦人語磊落見道叅幽玄異人異事會當傳為學韓公
稱道謝自然誰與刻向西郎巔姑姑塢堦邊玉劍前

天賜夫人詞

八月十五雙星會佳婦佳兒好婚對玉波冷浸芙蓉城
花月搖光照金翠黑風當筵滅紅燭一朵仙桃降天外
梁家有子是新郎罕氏忍從鍾建背負來燈下驚鬼物

雲鬢欹斜倒冠佩四肢紅玉軟無力夢斷春閨半酣醉
須臾舉目視傍人衣服不同言語異自說成都五千里
恍惚不知來此際玉容寂寞小山顰俛首無言兩行淚
甘心與作梁家婦詔起高門勝天賜幾年夫婿作相公
滿眼兒孫盡朝貴須知伉儷有緣分富者莫求貧莫棄
望夫山頭更賦白頭吟要作夫妻豈天意君看符氏與
薄姬關繫數朝天子事

綠珠詞

石郎癡騷誇多財三斛明珠買禍胎墜樓獨有一綠珠
綠珠不負三斛珠君不見息媯無言生成王西施歌舞
向五湖水流花落金谷園土花零亂埋花鈿娼女笑殺
真女憐欲著明珠三百斛金谷園中買玉谷

朝雲詞

章惇不愛東坡睡再著罪名投海外骨肉故舊但哭送
朝雲請行了無畏朝為行雲暮為雨朝朝暮暮珠厓下
為憐國士奉巾櫛禿髮無眉都不顧海南又甚大法場

春淺愁深不可當一夜東風掃落花為賦海棠空斷腸
三作埋文盛德事掩淚無言誌王氏文正清獻及張公
地底雄文還有四君不見世間多少迴頭人舊花摘却繫
新裙癡哥癡哥笑朝雲翻手覆手江上雲

讀鄉先生劉景玄碑

太行元氣果不死弊世有此魁傑士
胸中羅列世間書泛異窮奇無不至
嘗借莊周十日還成誦未嘗遺一字
萬言點識殆片時記問區區總餘事
詩文清雄簡且高

闊步不讓坡谷豪散談四座誰敢言橫膝搔吻獨滔滔
未見皆如汲冢竹劃開書若并州刀超遙孤風送行雲
爽朗夜月虛秋濤初欲有為下天井寡鶴遂把霜毛整
時危事去可傍人清露滿天還自警終不一到當塗門
回視俗子徒紛紛洛城西南有佳處竹間水遶梅花村
此中儘可嚼佳句笑傲煙霞有深趣著書藏山不示人
坐看石田生老樹九臯清唳誰不聞海內至今揚清芬
鄉閭晚生不及見掩淚空讀遺山文

讀麻徵君遺文

太初百煉透光鏡
突兀心魄無氛埃
神姦遜伏徹膽寒
日月分曜乾坤開
一詩拈出託恠銅
挂向青天白玉臺
陋儒效顰不敢視
一世盡服瑰奇才
予時髫童誦黃口
似為古人今未有
忽從亂後得遺文
磊落從橫百餘首
就中不獨此篇奇
黃金滿籬珠滿斗
高古遠探秦漢前
與雅要繼詩書後
正大初從孟及韓
新澁却將韓變柳
金源百年富詩文
伊洛一派獨徵君
說易不肯坐臯比

公卿大夫日盈門工夫詣理全道技日薄崦嵫終隱淪
嗚呼一鏡墮渺茫血食肉漬莓苔昏我欲重磨扣帝閭
虎豹呵禦不得聞魑魅魍魎忽成羣

湖水來

枯風怒遏長川迴兩湖五月生黃埃水晶宮碎洲渚出
昆明老火飛狂灰魚龍錯落半生死乾坤枯槁無雲雷
海鯨怒抉海眼破濤頭一箭湖水來新聲汨汨入黑壤
寒虹矯矯收蒼霧鷗鳥靜盡波不起澄清無瑕玉鏡開

浮光四動青雲第，倒影半浸黃金臺。何當乘興呼太白，
棹歌長入琉璃堆。滿船明月露華冷，翠綃銀管飛瓊盃。
梨花曲

春風羅綺傾城出，踏破一川生。恨綠競堆芳樹，占春光。
海棠癡睡天桃俗，梨花兩株最幽妍。姑射風神素娥骨，
微光半展兩三葉。弱蒂相扶生一簇，膩粉攢攢青淡淡。
纖纖翡翠輕輕玉，開尊徹幕對芳姿。一時英俊皆潘陸，
辭鋒席上戰珠璣。談藪胸中湧川谷，肝腸爛漫發天巖。

滔滔濯洗澆醺醪虹霓萬丈氣相許削去町畦開窘束
或如磊磊搖孤松或似森森掃秋竹或如赤驥奔長風
或似蒼虬起幽窟歡成氣合花亦喜舞殺微風香藪藪
踈陰浮動酒盃中一吸霜魂清滿腹綠鶯飛來隔花語
花間似聽飛瓊曲卑枝拂面不忍折醉眼高橫看不足
所恨此花不解語與說瑤池舊追逐又恨此花不解飲
共醉廣寒宮內宿最憐人散月玲瓏玉容寂寞還幽獨

題琴戚先生畫像

齊人善瑟王好竽達也豈效伶人趨歸來坐石樓長裾
突兀天地為蘧廬王門有路多塵土封豕磨牙鬪號虎
何如此曲不須彈風入長松鳴太古

聽角行

贈漢上趙丈仁甫

疎星澹不芒破月冷無色千年塞下曲忽向窗中得當
空勁作六龍嘶四海一聲天地寂長呼渺渺振長風引
起浮雲却無力此聲誰謂非惡聲借問何人有長策漢
家有客北海北節毛落盡頭毛白聽此空令雙淚垂中

原雁斷無消息南枝越鳥莫驚飛
牢落天涯永相失江上舊梅花
今夜落誰家樓頭有恨知何事
牽住青空幾縷霞

蜀亡嘆贈眉山唐仲明

子規啼缺峨眉月嘉陵江中半江血
青天蜀道為坦途馬蹄蹴落陰山雪
芙蓉城碎朔風急虓虎磨牙綺羅穴
不識兵戈三百年疊鼓一聲肝膽裂
小臣闔死尚南首大臣見殺猶望闕
漢家陽九厄再逢忽焉王氣西南絕

孔明廟前老柏死四賢堂上英靈滅愁雲深連白帝城
哀湍遠瀉瞿塘峽坡仙玉里子西孫挺身北走來中原

峨岷秋色橫眉宇骭髀獨倚燕市門時望蘓樓一回首
漠漠萬里煙塵昏古言蜀險甲天下一夫扞禦足成霸

前劉後李王復孟虎視中原雄並駕于今底事谷為陵
錦城萬里趨龍庭當時不與秦塞通一天自可延千齡

吾子莫漫嗟飄零厲階權輿實五丁

仲明初被俘鬻於燕市自言子西孫

且道陳侍郎被執不屈朝服望闕自盡賢王課端為立
祠事安陸趙仁甫作疏鳩貲贖之疏中有云錦江秀色

都為巴蜀之蕭條玉壘浮雲盡入峨眉之悲慘
余讀而傷之故作蜀亡嘆異仲明為行券云

西郎吟上左副賈侯

西郎戔戔秋凌空萬壑秋氣丹霄通翠盤燕趙一千里
蒼東刀巖十二峯壁立不讓恒山雄顏行欲過東海東
老鷹南來駕黃隼結巢便入山靈宮羽毛不鍛爪距禿
肅雲慘月驚長風巨靈雖為重御護秋穴幾為脩蛇訐
音洪相君巖巖西郎秀壽與西郎高不朽老鷹黃隼正吾
儕亦賴恩靈庇黃口黃金臺上秋風高會當凌風快鴻

毛為公搏擊毆雲鷗

懷素青帝鬪將二帖歌

青布高垂誇美酒醉僧扶書賒幾斗朝朝挂向長安市
行人看書不飲酒唐家既滅酒家亡青帝草聖千載後
瀚海西邊唐將鬪將軍揮戈賊連穀當時本自說戰功
却使醉僧誇好手筆勢更比青帝雄常山長蛇救尾首
賈侯愛玩看不休不肖挿向萬卷樓壁間一雙岳湛壁
洒落神俊懸清秋見我酒酣使題評快飲數鍾澆枯喉

為說草書秦漢間變出楷隸蓋有由但存妙處遺土直
縱筆自如成鎖鈎大巧既窮出大拙作者每向無心求
所以顛張醉素嗜酒能出奇放浪縱恣隘九州天矯騰蛟
龍峻利森戈矛婀娜春樹花蕭颯秋江鷗兔起復鶻落
雲行溪水流神聚精不散扶怪還撐幽都非有意舉自
然所以超凡入聖直與造化侔陶然以酒遇天趣一著
直在最上頭莫言只作醉僧圖君未得醉方隱憂一身
纏縛萬古愁焉能浩浩復悠悠侯乃大笑言君更飲數

甌壁間又添珠一斛三帖使我子孫收

再飲陵山春

滿城山城好風土土厚人淳樹木古陵山倒壓西南城
山泉白重如鍾乳山家釀作陵山春春波滉瀟紅蓮府
朝朝撾鼓獻大捷醉殺張公萬貔虎予年甫童監推酤
直向山根置官務涸泉為酒酒如泉潮沸雲蒸日傾注
撥開醅面漲霞腴輕膩鵝黃湛玉湖石泥大白不動聲
米脂浮顆泛金酥清香挿腦甚酷烈冷飲頓覺詩腸熟

萬卷強將一斗澆春入四肢紅兩頰詩腸自此為酒海
痛飲高歌忍千載昨來夜燕秋月堂風味依然渾不改
只無山色與泉聲滿耳笙歌不欲聽何當揭瓮看流清
一汲春泉快渴鯨不須注金仍注瓦醉臥婆婆古槐下

長歌哀李長吉

元和比出屠龍客三斷韋編兩毛白黃塵草樹徒紛紜
幾人探得神仙格青衣小兒下玉京滿天星斗兩手摘
胃中旁魄銀河湧驅出鱣鯨噴霜雪逸氣似與秋天杳

辭鋒忽劃青雲裂，剗空一劍斷晴霓。
齊梁妖孽皆泣血，上帝俄驚久不來。
恐向塵寰覆迷轍，赤虬嘶入造化窟。
千丈虹光遶明月，人間不復見奇才。
白玉樓頭耿孤潔，自此雄文價益高。
翠華灼爍紫霓掣，我生不幸不同時。
安得從衡驚清絕，思君岳岳矯首立。
扣破玄關天地寂，忽驚鳳鳥入寥廓。
恍惚渾疑見顏色，車聲嘒管縹緲間。
亂霞顛倒無蹤跡，六龍驤翼夾秋日。
神鼎俄空鉉華碧，丹霄盤礴冠元精。
縱有新詩招不得，煙淒淒兮鎖瑤臺。

望王孫兮去未迴
瑛瑛玉樹生瑤堦
有瑤花兮花不開
仰天三嘆天無語
萬里長風酒一盃

壽元內翰

秋風颭颭吹庭梧
長庚吐焰橫太虛
遺山先生曳長裾
醉鞭黃鵠來天隅
蹴開化窟肆搜取
玉斗倒瀉明月珠
九泉呼屈原底事
為焦枯青雲問李
白佳句今何如
百年元氣一盃酒
千丈光輝萬卷書
高臥一曲歌聲價
百碑礫雲璈宮徵
奏玉宇春鶯花柳
鳴天衢惜哉時不
與

命偶西周削弱為東都明堂一柱入樵採安得致主為
唐虞遺山山頭有舊廬歸來亦足為歡娛既有墮地風
雲之驪駒又有竹花弄語之鷓鴣仰天一笑萬事足倒
騎箕尾遊蓬壺

辨磨甘露碑

國賊反城自為功萬段不足仍推崇勒文頌德名學士
潯南先生付一死林希更不顧名節兄為起草弟親刻
省前便磨甘露碑書丹即用宰相血百年涵養一塗地

父老來看閭流涕數尊黃封幾斛米賣却家聲都不計
傾覆宋社責金源吠堯極口無覩顏作詩為告曹聽翁
且莫獨罪元遺山

陵川集卷八

欽定四庫全書薈要卷一萬六千一百二十五

集部

陵川集卷九

元 郝經 撰

歌詩

讀党承旨集

一代必有名世人瑰偉特達為儒宗接續元氣大命脉
主張吾道追軻雄金源文物纂遼宋國初尚有宣政風
世宗大定三十年師干不試信命通藻飾皇度議事典

培植教養王化隆勝殘去殺於子仁繼以泰和尤昭融
中間承旨掌絲綸一變至道尤沈雄歸然度越追李唐
誠盡簡質辭雍容斲雕剝爛故為新暢達明粹理必窮
漢火百煉金源金周制一用中華中混然更比坡仙純
突兀又一篇文章公自此始為金國文崑崙發源大河東
伊昔避亂洙泗間太平頂隱東蒙峰學書遍寫竹溪葉
琢句迥倚徂徠松古文隸篆妙入神風雅韻勝超樊籠
邈然欲作魯兩生放浪海上尋高蹤中原有主始出仕

白頭射策開天聰進退不苟尤老成蓬累偶爾為蛇龍
先皇實錄似貞觀往往筆補造化功鎬王一詔說帝心
懇惻義與大誥同告歸復擁仙巖節君臣道合全始終
文孺子端拜道左請更指授祛矇聾為言但當多讀書
不求於工應自工嗚呼後學安得知客氣趁俗塗青紅
承旨有集當重讀官樣妥貼腴且豐秋風蕭颯黃金臺
紫氣正遶燕山宮果如公言讀盡世間書必如真龍出
九重一洗萬古凡馬空

書蔡正甫集後

哀哉蕭間蔡丞相崔浩幸免門房誅文采風流今尚存
筆力矯矯鍾遺孤中朝尚文屬安治儒雅柄用敦詩書
揚厲偉蹟加潤色鋪張鴻休尊典謨共推小蔡燕許手
金石瑰奇近世無森森凡例本六經貫穿百代恢規模
追琢山嶽礧琬琰郊廟祠宇神鬼墟斷鰲立極走四夷
銘功頌德流八區煎膠續弦復一韓高古勁欲摩歐蘓
幾回細看聖安碑區別二代張吾儒車輪眼孔斗大膽

突兀正論搖天樞滔滔更辯燕王墓證據古今攄惱証
瑣屑芥蒂一無遺有似爾雅編蟲魚不肖蹈襲抵自作
建瓴一派雄燕都昨從張公借書讀文府武庫渾不殊
堆山疊岸亂策中煙煤一書纏網蛛為讀忽見文正宗
歸來撫卷為嗟吁規矩準繩有大匠自視所作何粗疎
乃今政須日一通深探海底尋驪珠更書卷尾記年月
龍集己酉八月初

登龍興閣觀銅像

轉空岌岌金碧鱗平地突起三百年我來一登秋雨霽
壯氣奕奕排霜天初疑櫟桶欲飛動復恐棟宇將騰騫
峩峩鰲頭昂出六合外地軸欲斷還相連鈎心詰屈牛
斗度光景煥爛日月躔高標樞極森戶牖囚鎖造化蟠
風烟上窮九霄下九泉中有十丈植立之金仙焜煌照
曜手眼千提挈萬象歸幘旋把握心印持化權蕩揺幻
海開福田吾徒問學一見亦瞻仰彼伊紛紛無所守宜
乎奔走狂蹶顛天地萬物同一身手眼億兆元無邊各

因私智自閼塞所以一目無所視一手還拘攣周旋憑
欄肆遐矚太行潯水吾山川孤鴻渺渺入天末遠引幽
思參茫然何當乘化恣所徃日馭叱起先著鞭掃除塵
翳快一濯眼界廓廓開坤乾

趙邈齋伏虎圖行

南山射虎曾得名壁上忽見令我驚何物敢爾來戶庭
屢叱不動仍生獍畫師前身是山靈胸中有虎無丹青
老櫟數筆平掃成殺氣慘淡猛氣橫頭顱半妥蹲孤城

怒尾倒插蟠霜旌鐵鬚張磔疑有聲赤吻瀝血猶帶腥
抱石欲卧復欲騰爪入石角瞳不瞑寒電夾鏡騫兩睛
四座凜凜陰風生威稜神采出典刑邈齷乃是金天精
伊昔詩家杜少陵酷愛賦馬并賦鷹為憐神俊故屢稱
我今賦虎亦有徵要得猛士建太平坐令四海皆澄清
吁嗟擲筆還撫膺世間道路多棘荆俛鬼磨牙不可行
跋展子虔畫齊後主幸晉陽宮圖

盲人歌殺斛律光無愁天子幸晉陽步搖高翹翥鸞皇

錦韉玉勒羅妃嬙馬後獵豹金琅璫最前海青側翅望
龍旗參差不成行旄頭大燾懸天狼胡夷雜服異前王
況乃更比文宣狂眼中不覺鄴城荒行樂未足游幸忙
君不見宇文寢苦戈滿霜黃河不冰便著一葦航癡兒
正看新點妝浪走更號無上皇狂童之狂真可傷展生
貌此示國亡圖邊好著普六茹并寄江南陳後主門前
便有韓擒虎

山陽橙歌贈緱子玉

太行之陽大河之曲鬱洞庭之秋色結江南之尤物西
風萬里吹吳霜黃入新橙變寒綠河山孕秀渾不異風
味矯矯清亦足緱君遺我秋滿座瘴雨蠻烟遶茅屋黃
龍飛去失新卵壯士熟視不敢觸急呼西施南威一雙
婢便擘輕金染纖玉崆峒酒海入盃盤快作鯨吞香滿
腹齒頰戛戛秋風生浮動霜天穿月窟憑凌喚李白共
酌劉伶骨從渠人間世擾擾還碌碌淋漓傾倒發天藏
傾盡明珠三萬斛

鼠毫筆行贈劉遠

輕風吹衣硯滴乾胸中有思如湧泉此時正賴毛錐子
束縛贈我森戈鋌遼東黃貂健且圓得法自遠源也傳
巫閭山色來幽燕鴨綠巨浸涵中邊貯雲停霧薄且堅
雖距一米雄於椽宣城必須試誠懸山谷枉道能三錢
雖云好手必利器心手器要三者全近聞清秋十萬騎
長槍闊劒凌霜天如何明窗淨几執此對聖賢撼搖風
雨一萬字瑰廟日月三千篇元氣萬象歸斡旋

贈楊伯通

天機奪得探天幽，七襄掌上如泉流。
飄然聲名半九州，倒騎箕尾燕市遊。
河山壯觀在眉宇，總萃萬化摩高秋。
世人擾擾入揮斤，公為布衣公王侯。
即今鸞鳳與蛟虬，垂翅枳棘蟠囂湫。
何時風雲各變化，白日矯矯登鰲頭。
緯亢行

歲臨鶉火斗插子，穉陽欲復老陰死。
朱靈南極元龜首，望舒北至明堂裏。
乾坤翻覆變已窮，氣數朝元將有啟。

旄頭日沒正當中五緯將且躔蒼龍羣陰已伏衆星沒
玄天變白生清風兩角在南大角北龍頭半安朝上宮
誰知總向亢中聚同舍參差不同度歲鎮熒惑共光明
金水煌煌俱不怒東西絡繹似連珠色正芒寒共昭布
往年長星掃金源前年孛入紫微垣攬櫜妖客不時出
天狗枉矢還驚傳今朝太平有此象不久再見成康年
昔時曾聞入房駟兆啟金商六百祀同來東井漢元年
四百年中稱帝制後來丁卯煥文章二百餘年方季世

曾逢丙午當百六今日重逢又重六五星忽來會辰前
不知誰禍為誰福網紀梁棟兩攝提招搖玄戈動光輝
馬祖直欲飲亢池星翁歷史休相欺正是君臣會合時
丙午冬十有一月越十有五日常未五星會於亢太陽
躔斗十九度太陰經心五度木星躔亢二度八十三分
十抄在辰前逆行六日行一度土星躔亢宿一度三分
在辰前順疾十日半行一度金星躔亢一度六十四分
四十六抄在辰前順疾一日行一度火星在亢東五度
六十二分半在辰前順疾二日行一度水星躔亢三度
三十二分三十抄在辰前順疾一日行一
度以其五緯皆躔于亢故謂之緯亢云

答李淑玉

古稱燕趙多奇士乃今於君還見之襟懷落落絕點滓
雲夢湛澈涵天池玉虹千丈青羅天赤驥萬里黃金羈
文章翰墨特餘事字量蘊蓄乾坤奇昔年贈我以長句
靡旌摩壘來致師吾方堅壁養吾銳十年不戰空相持
昨朝燕王古臺下慷慨懷古傾酒卮一鼓作氣森辭鋒
再鼓建旆開襟期須臾合沓閤談數錦囊亂瀉明玉璣
上稽唐虞下周孔推索究竟餘無遺嗚呼吾道甚綴旒
絕無僅有真可悲何當扶義帥衆軍鼓吹六經張四維

縱橫闢去異端異穴振起衰世衰廓清推陷驚正路
剷除荆棘驅狐狸景星會入奎壁府祆祲倒卷蚩尤旗
吾民仁壽吾道行聞望萬古江河馳

唐十臣像歌

魏徵李白郭子儀渾瑊顏真卿韓愈白居易牛僧孺崔慎由司空圖

鄭公山立面栗黃袖中隱隱露諫章致君堯舜肩禹湯
太宗一鏡今不亡謫仙翩然來帝鄉淋漓籠巾倚御床
斗酒百篇錦繡腸光焰至今萬丈長汾陽沈雄異姓王
中興功業冠有唐人臣始終壽且昌深山大澤龍蛇藏

咸寧氣貌慘不揚殺氣凜凜橫天狼回天再造忠且強
功名端不讓汾陽太師魯公日角方挺特不撓百鍊鋼
端笏正朝貌堂堂盧杞藍面不敢望昌黎高冠何昂昂
泰山北斗元氣傍天衢搖曳雲錦裳斥去老佛擅文章
樂天脩然世相忘江水蕩漾江花香不作房杜庸何傷
歌詩直與日月光奇章重厚國棟梁亂來粗能立紀綱
太平無象稱小康不計黨禍深膏肓崔相憂國眉兩龐
區別流品何太忙天子閉目猶自防曹節侯覽不可量

司空表聖宜賢良清癯不欲遊巖廊詩外有味誰肯嘗
寡鶴飛去高翔翔

樓子白蓮

玉樓一尺千蘂攢綠雲高擁白玉盤真出清波絕點塵
水仙解種水牡丹秋渚亭亭倚妍素冰肌不受燕脂汗
都將金粉抹蘭膏香盡西風一天露洛神漢女回清顧
脉脉溶溶縱微步我將一葉臥為舟載向水晶宮裏住
誰意無心復無子褪雪堆霜委波底空餘潔白漫清高

古來薄命皆如此

宣和內人圖

牡丹橫壓搔頭玉眼尾秋江翦寒綠金翠冠梳抹且肩
正是宣和舊妝束腰肢一搦不勝衣當時宜瘦不宜肥
三千想見無顏色偏有親題御製詩蔡攸恢復燕山府
曾索君王不曾許蕭條萬里去中原偶見花枝淚如雨
却將換米向三韓遂令流落在人間道君一顧曾傾國
今人休作等閒看

薛稷舞鶴圖

丹砂入頂開雪翎雙膝半屈玄裳輕一天清露月滿庭
浮烟弄影來玉京當時華表曾留形只見翻翥還無聲
畫工姓薛不姓丁前身亦是胎禽精素練忽展江邊亭
長風脩脩筆下生洪流蕩滴排重局抖擻寒玉凌赤城
我欲援琴鼓湘靈低昂曲折仍有情壁間至今不肯停
洒落一見曾次清請君休讀瘞鶴銘為君更寫舞鶴行

索靖月儀帖

草書初工漢晉末超凡入聖張與索伯英冠軍名貫索
數行一筆鈎鎖活索靖變體作章草草法如真楷為草
出筆似隸簡且婉態度益多縈結少一畫大抵皆三變
却把張芝墨帋練包藏飛動為妥帖功夫總向中邊見
昨從中秘得月儀古意遠過王羲之世人草法宗會稽
章草自此識者稀二十六幅兼閏餘玉盤亂走明月珠
辭尤簡嚴勢深秀字字出奇世所無如印印泥筆不差
短長肥瘦無損加鈎心鬪角方且停半妥遠山飛小雅

古人下筆不輕易一世功夫成幾字由來絕藝屬高人
鹵莽焉能作能事當時瓘死岳亦亡一妙不可在洛陽
秋風揮淚指銅駝此生不用尚書郎風度超然如靖節
洒落孤風與明月須知萬古冰雪姿就中自有蛟龍畫
君看顛張醉素兩禿翁半盆墨酒澆心胸世人不識畫
稱工乾坤模糊眼正黑豈知更有月儀帖

跋党承旨篆字太白琴譜

右軍學書世界黑扶桑墨盡西海竭竹溪學書無片紙

寫遍千山萬山葉太白琴讚二尺餘丞相小篆承旨書
端勁妥貼肆雄奇展盡筆力世所無綠綺徽聲絕絃久
嶧陽孤桐至今有知音賴得謫仙詞揮洒又逢天下手
問說琴臺在魯山磨崖深刻亦何難青天二絕一萬古
絕勝區區坐上看

書黃華涿郡先主廟碑陰

稱道孔明獨有杜少陵論著昭烈復見王黃華君臣一
體始無愧蜀相祠望樓桑家昨因應詔過燕南青林一

簇啼鳶鴉簫鼓寂寞村社散廊廡慘淡昏龍蛇西南一
碑刻蒼玉每讀輒止驚咨嗟磊落一片恢復心始終於
仁無少差當陽之言永安命三代聖王何以加仲謀雄
畧祗僭偽阿瞞詭譎空姦邪論議到此真不欺文采絢
縟森芳葩書法二王作真行得意韻勝如時花歌謠慷
慨燕趙義士風但恨不能完漢軍敗崩三巴百匝細讀
立復坐不覺午日傾簷牙徬徨欲去不忍去饑馬更繫
枯荆楂東夷何以得此人日出之圖王氣韜朝霞滅遼

服宋帝諸夏禮樂制度無疵瑕家世章廟布衣臣貴胄
鼎族來幽遐春深徑渡鴨綠江太行山巔高挂浮海槎
風流儒雅冠當代碧雲玉樹叢烏紗漢魏以來無此作
作詩為向諸生誇

入燕行

南風綠盡燕南草一桁青山翠如掃驪珠盡擘滄海門
王氣夜塞居庸道魚龍萬里入都會瀕洞合沓何擾擾
黃金臺邊布衣客拊髀激歎肝胆裂塵埃滿面人不識

骭骸偃蹇虹蜺結九原喚起燕太子一樽快與澆明月
英雄豈以成敗論千古志士推奇節荆卿雖云事不就
氣壓咸陽與俱滅何如石晉割燕雲呼人作父為人臣
偷生一時快一已遂使王氣南北分天王幾度作降虜
禍亂衮衮開其源誰能倒挽析津水與洗當時晉人恥
崑崙直上尋田疇漠漠丹霄跨箕尾

跋魯公送劉太冲序帖

魯公筆法皆正筆出奇獨有劉太冲初從真草入行草

削去畦町尤清雄懸針數筆皆側鋒
往往矯矯如飛龍
翰困權奇恣揮洒瑰偉乃見烈士風
觀此好向書家道
未有能真不能草

荆公配享小像碑本

天津月明聞杜鵑愁殺洛下無名公
未幾南人果為相
汴梁化作單于宮老泉初作辯姦論
舉世盼矐俱未信
王衍盧杞合一人熙豐末年禍始釁
小遷累讓謙萬端
一知制誥不辭官臯夔稷契高自稱
敢把官家輒面謾

富强豈是吾儒事王道何嘗利為利却將孔孟作申韓
刻剝生靈壞元氣顛倒乾坤事事新規模偽莽與孤秦
底事當時不便亡祖宗恩澤猶在人西窗更勸殺韓富
所幸不從天且祐惠卿遽已發私書佞人不遠將誰咎
獻可即日殫新參罪狀十事猶叵堪朝臣縮手疑太早
後來君實亦為慙至今宗廟無片瓦學術終然殺天下
燕山竟不得寸土瓜步江寒飲戎馬當時三黨皆奇才
共成國禍真可哀可能陳竇勝牛李未能朋亡皆禍胎

仲尼日月萬古一顏孟大賢纔入室首惡要伏春秋誅
更可巍巍聖人側俵鬼諛讎死不休更期不朽鑄頑石
世間萬事難盡曉三韓分米買日厯

定武蘭亭帖

會稽蘭亭修禊草一世真行此尤好當時信手叙興感
心手兩忘都壓倒法度備具郁有神一篇秋水逍遙身
不知孰為鍾太傅何處復有衛夫人有時姿媚似花朵
却向莊嚴生婀娜蕭然自有林下風野逸行間亂塗抹

字字不同數十之清流激湍黠黠奇管絃豈計絲與竹

九方相馬誤黃驪遂使書家推第一昭陵玉匣藏真跡
歐虞褚薛臨硬黃價重兼金與連壁溫韜刼墓出人間
縑墨生塵水水寒中秘緘封貴人手翰林待詔時得看
西蜀初傳刻棗板點畫傷硬亦蕭散後來定武刊翠琰
山陰春風還在眼君謨坡谷始盛稱韻勝遠過換鵝經
宋金以來三百年永和規模存典刑昨向燕都得善本
重為摹勒憂墜損雲龕細鑿黃金臺永與諸人作繩準

當時無意不欲傳只今視昔似偶然君不見浙江變作
黑水源越山筆冢高摩天運斤斲輪熟乃精從橫十萬
方無言初從有意到無意始知前賢道為技試看魯公
座位帖數幅書藁為二絕

望漢樓

漸臺斗折新莽死天下還歸赤帝子漢民恰見漢官儀
又值王郎與更始河北忠貞有耿純舉族徑欲隨官軍
孤城頓爾音信絕誓死不肯為賊臣築臺望漢賊滿目

蒼茫不見劉文叔饒陽一縷燎鬚烟正向蕪蒹食豆粥
滹沱冰合赤幟來犇麇解瓦驅風雷漢家一氣從此迴
城門不閉乾坤開誰知當時望漢臺即是畫像登雲臺
沙丘行

林胡逐出榆林塞滿國騎射衣冠改西游直入咸陽宮
趙王使者秦王駭玉鞭擊斷過函谷夜飲叢臺翻酒海
生前傳位稱主父一切都非三代故座中誰意有潘崇
宮甲盡起商臣怒熊蹯不來事益急雀觥雖探能幾日

一生英氣頓消散胡服掩面空垂泣祖龍亦向沙丘死
詐殺扶蘓書一紙武皇父子戰京師釁端也自開邊起
古來好殺多子禍浮山堰壞臺城餓至今金陵罵侯景
誰知亂本由臨賀君不見殷湯六百載周武八百年以
殺止殺救民命用兵雖人元自天孝子慈孫相繼傳

陵川集卷九

欽定四庫全書薈要卷一萬六千一百二十六

集部

陵川集卷十

元 郝經 撰

歌詩

宿鐵塔寺

西風蕭蕭暮烟涇滿袖青攜亂山入枯雲黯慘忽蔽空
未及黃昏陡昏黑行行暝投荒寺宿繫馬階除劒懸壁
中庭一塔揭暝色倔強生獐半生澁鐵龍雷轟不能蟄

怒尾呀天轉張礫湏吏蜚雨過前山密洒窗扉寒淅瀝
黃塵萬事隨雨來壯懷零落憂思集學成書劍兩無用
竟作窮塗奔走客短衣著處逐秋蓬誰信胸中有長策
孤燈照夜耿不眠老焰憧憧動輕碧寤言欲問復無言
抱膝長吟轉蕭索

楷木杖笏行

金源以來進士登第例授楷笏無則以槐代之今曲
阜祖庭有孔道輔釋褐時擊蛇笏殷血猶在橫絡一

綫旁迸數砂粒色若棗漆以水濯洗則其色鮮紅如
新澣著者今此笏乃其尺度故制也孔氏族人又以
長材為杖以贈好事者乙卯秋九月經拜謁墳林家
長翁以笏杖各十相貽故為賦此

兩楹夢斷壞梁木天出斯文生宰木翳雲擁霧二十里
虎踞龍蟠泰山足道德仁義為根株禮樂枝葉光扶踈
芘蔭百代吾道尊戶有絃誦家詩書中間揚墨常蠹食
重欲剪伐逢老釋崔嵬柯幹尚生意千古堂堂孟韓力

年來旦旦加斧斤幹為屑楔枝為薪知音抱去甚泣玉
觀者掩面如悲麟大橫庚庚紫蛇腹手版霑恩照緋綠
老儒扶藉見聖人豈並枯藤與桃竹斯文將墜吾道亡
不絕一綫甚濫觴豈為區區狗枯木亦如告朔存餼羊
孔氏家庭手植檜楷樹相望閱千世亂來秦火幾番燒
土黑灰寒共憔悴靈光殿基秋草深牧童相喚穿墳林
青蛙亂聒顏氏井饑烏落日啼白禽佩玉長裾新進士
回視詩書等閒事赭袍白馬飛將軍閬劍長鎗不識字

中原慘慘無神靈白骨蔽野無蒼生只知下石誰手援
老夫有淚洪河傾皇極厄會數流血誰與澄清倒溟渤
摩挲東家扣脰杖拂拭囊中擊蛇笏會當立聖蠲祆昏
鞭擊魚龍起春窟

手植檜孔子像

稷降播種生百穀封植積累鍾運木東枝扶桑西昧谷
柯葉蒼蔚盛文物七百餘年開世卜子欲代母彗東出
仲尼傷麟掩袂哭手植庭檜鍾遺躅三代脉絡拱把續

先王遺澤不滅沒歲寒高隱闕里屋忽遇秦火傷老佛
壞崩棟折不可復民莫庇陰殃禍酷千年餘根重儲蓄
孔庭家傳深韞匱遺我尺許香馥郁手澤膏潤如紫玉
道德根株太極骨神雖無方像髣髴刻劃乾儀鏤坤軸
象環綦組殷士服瀾翻海口與河目突兀六經還在腹
梁木可仰天未祝元氣不死生意足不須金身駭氓俗
見者再拜重祇肅文楷十里泰山麓墓前舉是常編竹
聖世不絕生民福我欲載之告四隩斤去偽邪信抑屈

矯矯更用擊蛇笏

并以楷木及墓竹緝神室故云

梁甫吟

南山有芙蓉北山有鯉魚河乾石亦爛海竭桑亦枯于
嗟乎將安歸乎南山有鸛雛北山有蒲蘆蒼梧竹不實
朝陽桐亦枯于嗟乎將安歸乎秋蘭兮青青秋菊兮有
英美人兮不來芳菲兮滿庭望美人兮山之阿褰桂子
兮披綠蘿美人兮不來臨風兮嘯歌荒山陂陀六龍蹉
跎雲雷不從將奈之何

封松行

始皇登泰山風雨暴至避於五松下已乃爵松為五
大夫今其處猶有穉松存焉乃為賦此

六國西移周道絕草木盡汙秦兵血泰山山頭五株松
黛色猶參周日月文武成湯深雨露八百年來養貞節
祖龍一旦侈心生坑深不用諸儒說千乘萬騎壓山谷
檢玉泥金自銘德鬼神呵禁不容上振雨凌風力飄蕩
人誅未即即天誅欲使碎骨千年障偶來擇音章偷生

濫爵斜封重誣謗真松本自如魯連泰山豈不如林放
山東赤帝子已生山靈亦已居芒碭秦皇雖云幸余亦
為松悲君不見湘妃祠前風雨夕赭山伐木一無遺

乙卯秋九月十九日登泰山太平頂

窮秋老雨四十日坤軸欲爛陰霾纏我來方作泰山游
玉虹一夜收雲烟山靈奕奕生喜色突兀撐裂青羅天
輕裾飄飄過黃峴乘興直到三峰前霜餘灌木出秋色
萬疊紅錦幪椒巔泓澄寒溜浸太古翠壁細寫珠璣圓

當時秦漢極侈麗未必如此皆天然天門中斷兩屹立
箭筈一磴蛇蜿蜒凌層絕頂肆崇峻佇立矯首望八埏
長天沉沉入西極九州却在東海邊衝風慘淡萬里來
海窟勁刮鯤鯨涎湏臾白雲生嶽麓脚底決瀉無山川
秦壇周觀覺浮動滿地覆冒兜羅綿忽疑山移入海中
白浪四洶虛濤掀山陰瑰詭光恠出赤氣翠暈相鈎連
下從谷底上碧落寶塔萬級高蟠旋遂登日觀叱日馭
六龍倒著珊瑚鞭玉鱗剝落金甲拆九芒迸綺生血鮮

三山搖蕩海水沸蓬壺縹緲來飛僊為言此色與此界
君自固有非塵緣恍然記悟復無語把手一笑三千年
華不注行

崑崙山顛半峰碧海風吹落猶帶溼意氣不欲隨羣山
獨倚青空迥然立平地拔起驚孱顏劒氣勁插青雲間
濟南名泉七十二會為一水來浸山我來方作鯨川遊
玉臺公子邀同舟君山浮嵐洞庭晚小孤滴翠清江秋
酒酣興極烟霏昏魚龍慘淡迴山根少陵不來謫仙死

舉盃更欲招其魂魂兮不來天亦老元氣崔嵬山自好
超超絕頂凌長風注目東溟望蓬島

嵎山陵行

五國興王兵一旅并滅兩家都一鼓燕雲忽使遼作金
汴洛遽令齊代楚乾坤入手肯與人根本未牢難遂取
漢人且使漢人看一旦不須煩再舉當時若欲存中國
只向京師留少主石家父子尚徒勞今次重來渾浪語
邦昌數月又劉豫二子猖狂都不悟誤添鱗角欲為龍

刮盡肌膚送兵賦我為其德爾為讐百姓囂囂怨嗟聚
君親無將將必誅大寶何人敢叨據臣節便棄真國奔
侈然竟致人神怒八年辛苦謾經營兩手歡欣却分付
祖宗天位爾乃奸倉皇被執欲免難嵒山山前齒已冷
道君猶自在三韓當時徼倖學敬瑭錯把金源比契丹
地下若逢張孝純赤汗滿面不敢看劉豫何須責邦昌
先已爾莫言從權為社稷爭忍便受傳國璽君不見榮
陽紀將軍也曾詐作漢天子漢王既脫不用生鼎鑊談

笑就一死

居庸行

驚風吹沙暮天黃死焰燎日橫天狼峴峴鐵穴六十里
塞口一噴來冰霜導騎局脊銜尾前羶車輾輾半側箱
彈箏峽道水復凍居庸關頭是羊腸橫拉恒代西太行
倒卷渤海東扶桑幽都却在南口南截斷北陸萬古強
當時金源帝中華建瓴形勢臨八方誰知末年亂紀綱
不使崇慶如明昌陰山火起飛蟄龍背負斗極開洪荒

直將尺箠定天下匹馬到處皆吾疆百年一債老虎走
室怒市色還猖狂遽令逆血洒玉殿六宮飲泣無天王
清夷門折黑風吼賊臣一夜掣鎖降北王淀裏骨成山
官軍城上不敢望更獻監牧四十萬舉國南渡尤倉皇
中原無人不足取高歌曳落歸帝鄉但留一旅時往來
不過數歲終滅亡潼關不守國無民便作龜茲能久長
汴梁無用築子城試看昌州三道墻

北嶺行

中原南北限兩嶺野狐高出大庾頂舉頭冠日尾插坤
橫亘一脊繚絕境五臺南望如培塿下視九州在深井
上有太古老死冰沙埋土食光烱烱盤磴滑硬草無根
枯石摩天隋生礦南人上來不敢前撲面欲倒風色猛
坡陀白骨與山齊慘淡萬里殺氣冷嶺北乾坤士馬雄
雪滿弓刀霜滿頸稀星如盃斗直上太白似月人有影
寄語漢家守城將莫向沙場浪馳騁

懷來醉歌

胡姬蟠頭臉如玉一撒青金腰線綠當門舉酒喚客嘗
俊入雙眸聳秋鶻白雲亂捲賓鐵文臘香一噴紅染唇
據鞍側鞚半淋鬣春風滿面不肖嗔繫馬門前折殘柳
玉液和林送官酒二十五絃裝百寶一派冰泉落纖手
須臾高歌半酡顏貂裘潑盡不覺寒誰道雪花大如席
舉鞭已過雞鳴山

雞鳴山行

一峰奇秀高插空萬馬踏碎青芙蓉桑乾黑浪落絕壁

霜淨天澄更覺雄窮邊絕徼誰曾顧千古行人少詩句
渾如定武看嘉山絕勝齊州華不注

沙陀行

老鼠山陰界墻北隱隱磷磷起沙磧泉腴草薦地高寒
王氣瑰雄當斗極幾回秦漢儘銷沉隔斷中原沒行跡
坡陀瀾漫重複重舊樂新尖宛如一天傾海倒白浪枯
中有生龍千萬匹雲屯霧郁無半岸水灩烟浮川谷溢
駉驂窟宅簸蕩寬駉駉康莊戛磨密參差不斷動魚文

凶瘴相銜翻蟻隙噴風掣電脫兔疾色別羣分鮮錦織
春迴凍裂怒蹄齧蹋碎冰天轟霹靂分馳茁壯賈餘俊
突兀權奇縮生力角伏踈促口义割目凸銅毬凹溝脊
鯨鬣瀾翻鳳臆橫山字圓平尾稍直飄飄舉是萬里足
徃徃玉立八九尺雪壓草根脂滿口不解人間有卓攄
腹腴氣猛穩且馴不喜牽籠喜迎敵隘視河山渾一抹
仰首西風聽鳴鏑古來伯樂未曾見天下更無多馬國
國初西北半天紅房駟光芒遶天策帳前白馬飛下天

青草年年益蕃息開國一戰何所須
木鐸五千跨生駒
百萬山崩排堵牆乘勝逐北過燕都
更得金源四十萬
大青小青絕世無回戈却取西南夷
奄有渥洼與余吾
長鬚巨鼻入監牧大宛空羣王作奴
崑崙蹴平飲河源
瑤池月窟皆長驅沙陀拓境數萬里
驥騄驍騰古無比
金粟堆空漢月沈馬上真人作天子
鸞端不在宴賜年
斗尾堆金勢難止西域既定右臂舉
皂旗隨風便南指
迅鋒踏破李王城抄騎直入杏花營
小關透漏潼關敗

嶢峰扶出汴梁驚黃流見底江漢狹我馬正渴方橫行
中原無人馬有足殘城破屋不足平風聲鶴唳皆落胆
但言有馬不問兵既平西海復南海馬鳴蕭蕭迴旆旌
歸來罷戰合長圍令如殺敵誰敢違包山絡海數千里
兩稍把手隔年期一朝圍合密鐵匝馬耳戢戢為藩籬
百獸擁起自衝蹙骨牙挂角傷毛皮先開一面放三日
然後共施弧矢威黃羊野馬不足數躡躡驅兕驅熊羆
赤霧不散肉山赭乾坤模糊血淋漓長陽上林莫大誇

舍長露短彼一時向令見此無復獵相如枉用多文辭
以戰為獵國俗然况乃萬里皆鞭笞馬多地廣兵力勁
將士能將馬為命終身騎射不離鞍辛苦生獐狍天性
每將饑渴勒狂橫一飽一肥無復病俊逸都無水草態
變化自有真龍性鼓鞳聲動便開張人人據鞍皆王良
直入飲血齧頭顱查牙生人潤枯腸所向空闊都無敵
遂令四海皆天王駢駝錦背高崔嵬玉帛萬國來梯航
琵琶絃急曳落高酤顏半醉馬乳香玉脂斂灩玻璃滑

浮動酥顙全粟黃供官大羣肉擁腫揮霍鴻洞如酒漿
馬頭一璞驚孱顏橫截數尺琢玉鞍絳革編珠排碎錦
繁纓小鈴絡金環前朝不數大無價九采奪目誰敢看
五花虎文稱裝束踏地恐破驕且閑大官牽來至尊御
馬前拜舞朝百蠻此時息民立紀綱泰山四維萬世安
地無與大兵無強何用更舉祗自殘天生此馬為天下
敵盡兵窮亦當罷五十年來不摘鞍安得瘡痍被王化
但願沙陀馬無數會見中原有新戶深宮九重不動塵

永使驂騑脫羈鼻

化城行

東郊野馬如馬驚依稀隱約還成城參差雉堞雲間橫
鰲頭岌業擎長鯨壯哉三都與兩京殿閣樓觀頽空明
丹雘峭麗歌且傾烟氣荏苒搖旆旌其中似有百萬兵
是邪非邪寂無聲秦邪漢邪杳難名長風忽來一掃清
赤日如血高天青霜淨沙乾雁鶩鳴路傍但見棘與荆
祗有慘淡萬古情人間城郭幾廢興一杯聚散皆化城

君不見始皇萬里防胡城人土並築頑如冰屈丐按劍
將土蒸堅能礪刀草不生神愁鬼哭枯血腥殺人盈城
著死爭只今安在與地平平地深谷為丘陵江南善守
鐵甕城城外有田不敢耕西北廣莫無一城控弦百萬
長橫行身為心城屋身城一朝破壞俱化升佇立感化
參玄冥乾坤翻覆一化城

鐵堠行

漢家窮兵漠南無王庭解甲百萬標北庭高摩斗尾似

陰山冰埋雪漬生鐵腥殺氣昏昏無白晝行人不識呼
鐵堞北去和林又數千衛霍過此猶窮鬪中原無人益
蕭條僅得呼韓一再朝子卿不來王嫱去平城冒頓仍
自驕長城蹴踏誰遮截千年費盡九州鐵道傍白骨皆
人堞井田廢後無長策

古長城吟

長城萬里長半是秦人骨一從飲河復飲江長城更無
飲馬窟金人又築三道城城南盡是金人骨君不見城

頭落日風沙黃北人長笑南人哭為告後人休築城三代有道無長城

白山行

鴛鴦灤東白石山一峯峻前尤高寒金蓮花擁玉芙蓉
奇秀誰教在此間頑冰積雪雕鏤就追琢琳琅露枯瘦
霧披烟染不能青草隱沙昏日依舊當時朱酈若相逢
玉京不運萬歲峯華陽宮中第一山沉水灌洗金泥封
瑰異無緣到華夏歲歲年年聚羊馬幾回重著吟鞭點

崔嵬貌作詩中畫曉來雨過無埃塵落月冷浸光更新
就中必有連城壁世間誰過三別人北山安得移山叟
移向石淙玉溪口太湖烏玉都壓倒更添風月三千首
戊午清明日大城南讀金太祖睿德神功碑

雜花妝樹燕草綠珠翠重重擁燕玉踏青車騎各一簇
嶢天一碑杏梢出暉肩垂袖立馬看穹龜交龍勢崛蟠
四面渾鏤堆字山填金剡畫黑蠟班冒頭遷史學舜典
序事班書雜文選銘章生民麗且婉太祖帝紀都一卷

初賄肅慎兆已陳日出之圖生聖人周雖舊邦命維新

不事殺戮義與仁海青一翅海西落兩國君臣俱不覺

鷓鴣聲裏降王縛漢民不失生聚樂平地突起金天龍

面如紫玉真英雄化行江漢服羌戎百年以來誇僞功

參用遼宋為帝制文采風流幾學士磊磊高文辭稱事

卓冠一代誰復似汴亡文物委地壞不收獨有此碑岌

業在幽州荒烟莽蒼無人讀使我掩面涕泗流鄭王已

自磨甘露故壠移來立新墓小民世情多心諱更欲去

除誰愛護不久拽仆野火焚後人不復見此文攀花再
讀傾一樽朗詠直過宣陽門

聽姚尚書彈玉磬琴

桐焦漆死聲無木首尾斷裂烏蛇腹江水絃索玉軫足
瑟瑟音徽明碧綠龍池鳳沼銘山谷高人熟香一揮拂
冰泉雜弄碎金玉沈著凍雨打踈荊磊落鏗錚不煩促
注坡寶馬急回復峻嶮屹立驚突兀蕭散清越重紆曲
委珮編磬輕撞觸霜秋月夜風萬斛帝子揮淚滿湘竹

大雅一變無塵俗斷絃今乃煎膠續名琴絕藝會遇難
頓覺古意生肺肝回視鄭衛何卑凡坐中乃有郝高山
子牙從今放手彈

趙州石橋

輪囷太古綠玉月半挿水面不挂天一石一段數十丈
大業至今七百年深銜密匝無罅隙嵌磨妥貼堅且圓
仰視壓面勢飛動勁欲拔起疑墜顛鬼功神力古未有
地維欲絕還鈎連蛟龍辟易泝水伏細紋參錯如新鐫

晴虹不散結元氣海捧縹緲纏蜚烟衝風倒景鯨背搖
金瀾澗養青環偏乾坤壯觀全趙雄幾回笑殺秦人鞭
往來細讀張相碑直與北嶽相輕軒先君有詩不忍看
摩挲華表空茫然

東坡先生畫像

曹州教授王安仁所藏
己未六月一日敬題

五精聚奎五季平三朝積累三蘓生東坡一龍獨崢嶸
抉裂西極來承明頓撼日月轟雷霆萬喙蓄縮喑不鳴
顛倒六合江河傾瀾翻奔注込四溟閎肆捩擺音闔掀鯤

鯨紆餘曲折重關局脫兔處女孫吳兵珠璧噴薄光恠
驚嘻笑怒罵似不情卒止禮義歸中聲既竭復鼓氣益
盈轉石決溜方施行變窮出奇伏且騰常山蛇走捩孤
鷹恣睢安閒便且輕鳥鳴花落春山晴根極孔孟據六
經道德仁義炳日星蹴踏漆園隘蘭陵揮斤戰國跨兩
京睥睨儀秦更縱橫每笑子雲譏長卿屈宋賈馬擷華
英李杜韓柳皆已并諸子百氏歸題評出入老佛雜刑
名雜不越理純粹精融會變化集大成更不蹈襲自名

家一張新錦秋江澄巉巉峨眉去天尺倒插崑崙有餘
力雪嶺隱日嘉陵深翻動鸞皇織金碧乾坤都作一錦
城回視前王甚寒乞書法淋漓元氣濕以隸為楷尤雄
崛為嫌顛張醉素俗特與魯公添出筆九天九地未曾
見總向篇章揮洒出備具百體窮道技橫拈豎出皆第
一奇才本欲濟時了慷慨屢進萬世策王道還疑仲舒
緩時務仍比陸贄切以重自任伊周學貫日嶮天天下
節大儒不使為大臣豪傑竟作文章伯區區小技皆游

戲舉是先生等閒事從渠喚作謫仙人恥作翰林直學
士當時不止忌才名凜凜都因有英氣初為子孫得宰
相竹筒吹喘競逐放陰謀毒手必置死禍致詩文厚誣
謗玉堂遽作赤壁磯金蓮却照儋山瘴政足大公無所
損粘天更覺風濤壯不恨不得居廟堂但恨夷甫誤蒼
生遂使諸戎更霸王一網打盡朝廷空八賊揶揄宗國
喪蘓公竟不到中原舒王却在凌烟上昔嘗讀公文今
乃拜公像至神無滯形丹青莫能狀畫工豈有浩然氣

謾著南箕翕舌空點痣不如夜寂對江月皜皜見公真

顏色

面間多黑
子故云

溫公畫像

王安仁藏

後來三代漢唐宋太師溫公絕世無汲黯魏徵與宋璟
馬遷劉向及仲舒問學德度兼名節純粹骨鯁一大儒
麒麟鳳凰代希有布帛菽粟民所須無心求世篤修身
正襟危坐三省吾以道事君入官聯循分守信不敢踰
進言格非理必盡渾厚質直辭無餘制禮作樂如成康

漸仁摩義期唐虞不幸熙豐方有為祖宗良法盡剷除
磊磊顯諫章十上不用不可一日居勇退不補樞密班
分司洛下甘著書論列治亂尤愛君心存魏闕身江湖
鉤深致遠推象數更擬太玄作潛虛窮神知化德亦盛
不忍赤子極焦枯一僮一馬哭裕陵萬民遮擁牽衣裾
有田不敢種青苗司馬相公來活予兩宮下詔登一相
旱火潑雨天下蘓東丹驚喜西夏服中朝突兀尊皇輿
誰知孔明食遽少以死勤事皆駭吁革弊治蠱雖未竟

已定鼎命開規模建炎國脉實在此紹聖姦黨徒厚誣
高風奕奕今共仰遺像尚可懲姦諛槁木寧有食肉相
隱隱但見金粟膚布衾自可覆蒼生貂蟬不稱山澤臞
泣然想見公薨時鬻衣致奠哭過車不獨此本在人間
一日四海皆畫圖更不負公有子瞻兩碑萬字堆瓊裾
刻石署公為首惡小人私計真區區

閑閑畫像

王安仁藏

烏巾鶴髮為雙肩丹沙嚙面深兩顴存神垂老孰與傳

正大八九天興前金源一代一坡仙金鑾玉堂三十年
泰山北斗斯文權道有師法學有淵中華命脉屹不偏
楚妃正色絕纖妍石光玉潔無腥羶高文大冊職所專
潤色帝業星霓纏體制妥貼開坤乾官樣典雅春容篇
筆力壯浪傾源泉草聖肆意揮雲烟晚年游戲西域禪
月江卷盡藤蘿涎清風脩脩易一編每欲杖屨尋伊川
熒惑犯昴光竟天不與亡國天惜賢始終無慊獨巍然
國初學士汴與燕世章蔡党方騰騫宣政佻靡快濯湔

補完大樸無雕鐫卿雲腴霞鳳鸞翮貝闕寶府珠璧聯
崇極欲圮龍步遷此老始終元氣全大儒巖廊筆如椽
六鰲一掣三山連紀甌隨地誰續絃破觚頓脰皆沈綿
東塗西抹競取憐夸紅婉紫十百千安得起公重著鞭
萬古一日當天懸德陵嘗賜公所服丹潮紅滿面公先
壬辰之變以禮部尚書翰林學士丞
旨卒於第人
以為天幸

高麗嘆

高麗立國千餘年跨山連海東北偏文物制度慕漢唐

衣冠禮樂如中原曾蹶場帝因太宗拒險守要尤精雄
瞰臨遼碣飲鴨綠風颿轉出東海東自被天兵都破碎
稱臣納質兵弗退殘滅虜掠五十年窮蹙無聊竟何罪
盡將生口賣幽燕年年探借高麗錢肌膚玉雪髮雲霧
羅列人肆真可憐前年令公輔太子鈞魚山前見天子
掩面過市衆皆哭哭聲痛入燕人耳幾迴事宋事遼金
不似今番冤苦深甘心曲股渾不信要把高麗都殺盡
嗚呼哀哉何時免此殺戮運

曉登昆陽故城

弓刀蹀躞西風鳴慘淡夜入昆陽城
踈星牢落楚氛黑立馬起坐東方明
凌晨歷覽增壯觀世祖凜凜猶如生
以寡敵衆古亦有以怯為勇夫誰能
始知謹厚是真勇彼偽不足當吾誠
眼中百萬已破碎著手一戰成中興
天定豈容人復勝新莽猶然事符命
漢家王氣滿咸陽空向漸臺看斗柄
憑高落落生壯懷萬里一片青山來
子陵不屈亦堪惜乃使耿鄧升雲臺
東都制度遂狹陋

王室陵夷寢傾覆漫將風節與維持終入曹瞞莫能救
巖巖高節固可奇濟時行道胡不為釣魚臺上秋風老
我欲與子論襟期蕭蕭草木南陽道龍虎春陵氣仍好
須當策杖向軍門整頓乾坤濟時了

武當道士歌

武當道士數十百亂兵驅來不動色就中一人尤瑰奇
兩頰紅潤鬚髮白恠目深涵漢江水仙骨迥立秋山石
肘後高懸綠玉符簪頭倒挂丹砂筆傍人為說不記年

上聖親傳官斗極掌上曾教起風雨袖中傾下生霹靂
玉肥燕嗽身體輕居無七箸不火食深巖綰縛龍幾潭
遠岫逍遙鶴一隻蕪香重與扣玄關為說天道方在北
斂藏形氣更不語我亦無言兩寥閒

巴陵女子行

并序

己未秋九月王師渡江大帥拔都及萬戶解成等自
鄂渚以一軍覘上流遂圍岳岳潰入於洞庭俘其遺
民以歸節婦巴陵女子韓希孟誓不辱于兵書詩衣

帛以見意赴江流以死其詩悲婉激切辭意壯烈有
古義士未到者今并其詩錄於左方嗚呼宋有天下
文治三百年其德澤龐厚膏於肌膚藏於骨髓民知
以義為守不為偷生一時計其培植也厚故其持藉
也堅乃知以義為國者人必以義歸之故希孟一女
子而義烈如是彼振纓束髮曳裾義冠名曰丈夫而
誦書學道以天下自任一旦臨死生之際操履云為
必大有以異於希孟矣余既高希孟之節且悲其志

作巴陵女子行以申其志云

北來諸軍飛渡江突騎一夜滿岳陽樓頭火起入閭巷
曹逃偶走如牛羊巴陵女子尚書婦生平不識門前路
亂兵驅出勢窘皇夫婿公姑在何處吞聲掩淚行且啼
啼痕沾濕越羅衣此身忍使人再辱裂帛暗寫臨終詩
上言社稷安危事下言投江誓天志一回宛轉一悲辛
心折魂飛不成字詩成淚盡赴江流蛾眉蕭颯天為愁
芙蓉零亂入秋水玉骨直葬青海頭古來烈婦纔一二

誰似巴陵更文理名與長江萬里流丞相魏公還不死

巴陵女子赴江詩

巴陵女子韓希孟魏公五世孫嫁與賈尚書男瓊為婦岳州破被虜之明日以衣帛書詩願好事君子相傳知吾宋家有守節者其詩云

宋未有天下堅正臣禮秉開國百戰功每陳唯雄整及其侍幼主臣心常炯炯帝曰卿北伐山戎今有警言死狗莫擊尾此行當繫頸即日陞辭行盡敵心欲逞

陳橋兵忽變不得守箕顙禪讓法堯舜民亦普安靜
有國三百年仁義道馳騁未改祖宗法天何賜灾眚
細思天地理中有幸不幸天果仁愛人大似裂冠袵
君誠不獨活臣實無魏邴失人與得人垂誠常耿耿
江南無謝安漠北有王猛所以戎馬來飛渡巴陵境
大江限南北今此一舴艋本期固封守誰知如畫餅
裂火燎崑岡不辨金與礪妾本良家子性僻守孤梗
嫁與尚書兒含香署蘭省直以才德合不棄宿瘤癭

初結合歡帶誓比日月昞駕鵞會雙飛比目願長並
豈期金石節化作桑榆景旄頭勢正然蚩尤氣先屏
不意風馬牛復此逸鄢郢一方遭虜刼六族死俄頃
退鷁落迅風孤鸞弔空影簪堅折白玉瓶沈斷青綆
死路定冥冥憂心常炳炳妾心堅不移改邑不改井
我本瑚璉器安有作溺皿志節匪轉石氣噓如吞鰐
不作爝火然願為死灰冷捨生念麴娥乞憐羞虎穿
借此清江水葬我全首領皇天如有知定許血面請

願魂化精衛填海使成嶺

武昌詞三首

并序

王師圍鄂游騎於金牛鎮得一婦人欲侵之厲聲曰
我夫婿翁姑皆死目前未即死又可受辱耶速與我
死遂置之自稱梅溪主人張素英作歌詩數篇以見
志尋以疾卒於湖中得一路分妻一日以無夫選賜
有功軍人即以掌批其頰對今上大呼曰妾夫將干
五百人扼敵沅州妾命婦也豈可辱於是乞速賜死

上矜其志賜之衣糧使有司存恤之以俟其夫亦尋
以疾卒又有漢陽教授之妻為一兵所掠義不受辱投
于沙湖三人者僕親見之皆可附希孟之義各為賦
詞以寓意云

巴陵女子韓希孟梅溪主人張素英解作歌詩還死節
不論傾國與傾城

烏鬼山頭鬧鼓聲武昌恭人攜孺兒黃鬚回鶻便批頰
義感萬乘真英奇

漢陽宣教是妾夫妾身未死緣事姑騎士朝來強擁去
抱石半夜投沙湖

使宋過濟南宴北渚亭

往年薄游宴渚亭高秋霜落波光清今年持節又來宴
菱葉荷花香半城城南倒插泰山脚城北沈涵海氣橫
週圍盡浸樓臺影魚鳥慣聞簫鼓聲錦堂流出珍珠冷
花底漂搖碎光烟名泉多在府第中繡簾深掩胭脂井
推波委濤到北渚匯蓄涵停數十頃虹去聲橋桁柳平分

破巨壑雲莊入燕，暝濟南名士多老成。行臺突兀皆名卿，樽中政有李北海。坐上寧無杜少陵，堰頭臘篍滿船求歌舞。要送行人行江南，風景已不殊渚亭。即是西湖亭。

古策行

贈高松嵒文舉

亂來小雅幾盡廢，文物典章俱掃地。紛紛隨世趨所向，天下幾人知篆隸。關南賴有高使君，書法一世推專門。諸家命脉究終始，力探遠蹈空古文。倔强鐫金還屈鐵。

勁利玉版昆吾切孔壁汲冢都破碎方矩圓規仍妥帖
儀真館中坐老天日看筆陣驅雲烟琴譜一字二尺許
顧盼頃刻還終篇圓熟省力似行草霜月冰泉勢尤好
自言一畫氣一口少為呼吸便傾倒是乃精意能入神
奏刀砉然如運斤文章亦說氣為主巧寓拙外意愈新
金源百年黨承旨明月夜光傳片紙屠龍誰意復有人
元氣堂堂元不死請君閣筆無妄書鐵門自買堆磚礫
他年必到秦丞相今日還逢李大夫

陵川集卷十



總校官候補中書臣吳紹灤

校對官助教臣卜維吉

謄錄監生臣魏淳耀

欽定四庫全書薈要

集部

陵川集卷十一至
三

詳校官助教臣謝登雋



欽定四庫全書薈要卷一萬六千一百二十七

集部

陵川集卷十一

元 郝經 撰

歌詩

西陵行

漢鼎已移心未已不肯分明作天子冕旒北面稱警蹕
造偽萬端難免死臨終更不謀禪代竊國規模有不在
人間解著鬼欺人地下還將縛鬼賣漫言題作征西墓

誰信西陵亦虛厝又說誰都九鳥井臭腐掘埋祇幾處
銅雀臺邊開歌舞兩眼難看滿黃土何須折履更分香
涕淚咿嚶效兒女君不見永安宮中漢昭烈重向孔明
託後主付君一片討賊心嗣子不才君自取天下英雄
只玄德操等區區真溷鼠

書畫錦堂碑後

兩朝定策推元勳君模楷法歐陽文豐碑突兀大字書
目射猶有五色雲德並汾陽盡終始器如霍光學問美

孔明才具汲黯直社稷大臣無與比西北無事中國安
三十年來只一韓乾坤都著錦繡裏笑殺錢王衣錦山
身安即是蒼生福畫錦名堂公所辱君不見萊公眼孔
似車輪美錦裁來便裏足

朝歌行

壯哉茲城冠河山老王回抱青孱顏建邦立極古有制
何乃獨在河朔間獨夫智力制天下瞰視中原強王霸
誰知天與六州王八百諸侯已從化摘星樓頭醉未醒

酒池一夜蜚血驚成湯高宗遂不祀珠宮瑤臺為土平
我來感歎重延佇驅車不入朝歌路陰風莽蒼吹短衣
落日投文比干墓

比干墓

斫脛河南比干墓崔嵬尚是武王土一丘直欲壓太行
一死能令重千古國亡突兀見真純龍逢與君冠夏殷
無人語與魏鄭公良臣不幸為忠臣已醢九侯紂猶怒
箕子佯狂微子去三仁一仁獨殺身剖心庶使王心悟

王終不悟國遂亡朝歌無人至今荒行人只拜比干墓
殷鑒千秋烏可忘

共山行

吾生嗜奇能討幽足跡徑欲窮九州會稽未得探禹穴
太行先作共山遊是時天地方閉塞固陰沍山靈愁
誰知真宰為我起蟄窟喜氣奕奕山光浮雲容煙影變
態出脈絡盡露峯巒稠宏富屹天造峭截窮彫鏤我
鰲脊一翠萬里壯綰出元氣直入東海頭中間膏腴甲

天下匱奇孕秀無與侔雲根漲玻璃寶藏劃不收玉鏡
面寒瑩皦皦明珠流泓澄百丈底錦石埋黃虬老蟾噴
彩忽蕩動萬山破碎翻神湫竹間老樹掛山骨綠玉葱
錯風颺颺不見孫公和荒臺等陵丘萬籟暗不鳴遽古
空悠悠何時無名公說破先天由一笑碧山下弄月凌
虛舟舉手謝浮世醉卧三千秋卷藏神紐入化府從渠
菌蠢還蜉蝣

太行望

半天遮斷連青城參差雉堞雲間橫當時十歲初渡河
舟中錯愕來相迎今年恰得到蘇門百泉亭上更崢嶸
千岳萬壑入絕壁落日倒銜山盡赤玉立萬仞磔鯨牙
金翠千層擁鰲脊天沈影重看不足雲淨煙虛晚尤碧
西北兩峯寒云是雙石人不覺淚橫臆患難思二親一
從戎馬三十年桑梓慘澹埋荆榛何時突兀過絕頂拜
掃丘園見鄉井黃沙峰頭間有千尺松灑盡苦淚吟長
風注目直向東海東

三汊北城月榭翫月醉歌

大河奔放千里一片黃鰲頭傑觀突起河中央露華漲
冷濯桂窟氛霧洗盡豁四旁濤山隱映生金輪水天不
辨渾金光杳然坐我月宮上星斗錯愕雲錦裳玉虹高
挂飲酒海黃流倒卷都淋浪兩行美人列嫦娥翠綃深
夜冰肌涼悄然清唱多怨曲攪亂羈思為停觴輕颺忽
來四座覺浮動吹落桂子颿颿生秋香急令撾鼓歌慷
慨驪龍掀舞白鳳翔玉牀插天抱孤月醉卧萬里銀河

長

望京府賞紅梅

汴梁宮中絳綃梅移向汴河堤上栽青條團搭

音

杏花

顥瑣細向陽才半開張公小隊呼我飲風色偃髯寒氣
凜玉銜徑踏黃河水貂帽颯簷掀紫錦金鞍細馬歌舞
人雪壓小橋不動塵入門下馬簇花晏紅蓮舊府花正
新玉川金波碧香酒折花遍插分素手春透寒梢未全
綻風流正要臙脂瘦賞梅不用歌落梅緩歌却著銀笙

惟愛香細擷生霞蘂浮動雲腴嚼一杯本是前村冷澹
花不稱王侯將相家明朝會散更向明月底藉雪凍吟
踈影裏

黃山草墅歌

一從蔡党闕文源復有黃山黃華相後先黃山古雅尤
老成迫蔡培党難重輕為避時名便把黃華放一頭聲
價亦自雄周京澹薄脩然無宦情玉階寡鶴誤一鳴書
法更比詩文精正筆子瞻變真卿壁窠大字儼重極方

停真行行草至顛草獨步一代真豪英昨嘗中酒觀此
本清風颯颯吹我醒卷軸甚大總是學易詩如如縱筆
自在縮墨繩正是莊生悟道書網破夢覺蝴蝶驚絲綸
不收魚不食湛徹盡見江底星鉛華洗淨出玉骨無意
偶與閒雲行中間態度自闊鏤剪裁不斷還相縈往往
筆不盡點綴藏道緊初疑不附著字字相犄角二王沒
後無草書顛張醉素空模糊只除洛陽楊風子認得黃
山趙塞驢

三峯山行

朔方善為幹腹兵豈肯掠地還攻城北王戰罷馬首迴
十年大軍不南行西域既定殺李王疾雷破柱關中驚
鷲鳥匿形深且蟠汴梁不悟空椎冰小關幸勝未足多
舉朝刻日期中興都人盡喜識者懼俄間遶出西南路
突騎一夜過散關漢江便著皮船渡襄陽有兵隔岸看
鄧州無人渾不顧縱入腹心將安歸彼騎豈足當吾步
脫兔一去不可及却兵洛澗將堅誤日日鏖戰深且艱

我師益忙敵亦閒短兵相擊數百里孤窮轉鬪甲盡殷

直向虎穴探虎子既入重地寧肯還掃境盡至欲一賭

前後百匝相回環就中真人有天命躍馬直上三峯山

黑風吹沙河水竭六合乾坤一片雪萬里投會卷土來

鐵水一池聲勢接丞相舉鞭摔帖音拈言大事已去吾死

節彥章雖難敵五王並命入敵身與決逆風生塹人自

戰冰滿刀頭凍槍折一敗塗地真可哀釣臺變作髑髏

血二十萬人皆死國至今白骨生青苔壕塹已平不放

箭城門著礮猶自開大臣壅閉骨肉疎事急又送曹王
來至了不去誤國賊向非汝南死社稷欲為靖康不可
得

青城行

壞山壓城殺氣黑一夜京城忽流血弓刀合沓滿掖庭
妃主喧呼總狼藉驅出宮門不敢哭血淚滿面無人色
戴樓門外是青城匍匐赴死誰敢停百年淫育儘塗地
死霧不散昏青冥英府親賢端可憐白首隨例亦就刑

最苦愛王家兩族二十餘年不曾出朝朝點數到堂前
每向官司求米肉男哥女妹自夫婦覩面相看冤更酷
一旦開門見天日推入行間便誅戮當時築城為郊祀
却與皇家作東市天興初年靖康末國破家亡酷相似
君取他人既如此今朝亦是尋常事君不見二百萬家
族盡赤八十里城皆瓦礫白骨更比青城多遺民獨向
王孫泣禍本骨肉相殘賊大臣蔽君尤雍塞至今行人
不歎承天門行人但嗟濠利宅城荒國滅猶有十仞墻

牆頭密匝生鐵棘

照碧堂行

榮惑入斗終下殿哭廟背城為一戰怒龍飛去轟霹靂
震碎乾坤掃孤電倉皇不乘破竹勢苟且只與姦臣便
旌旗慘澹入宋州爭似全師祇守汴四郊皆壘彈丸城
玩主潛生肘腋變官奴闖茸本驚下輒敢鴟張學韓建
宮中梟獍有小錘密結兇渠欲為亂公卿誅徒威權去
左右俄空侍衛換開門日日向敵言旦夕須將天子獻

事急壯士能感激決計惟當下手先卿為其易朕為難
傳呼便詔將軍見升堂進謁遽令前太阿倒持仍使看

王敦但覺赤日壓金忠甚駭決背汗倚門力士驚盼瞳

面無肉色復肉臙

同袒

膽定徐徐索劍還徑斫逆賊肩膂

斷照碧堂紅血滿壁手刃不覺御衣濺顧盼黨與皆就

禽禁蹕忽清祆霧散此時便亡心亦足外敵雖強無內

難臨危突兀翦強臣絕地求生未曾見古來惟有敬宗

奮袂誅爾朱今朝天興拔劍斫官奴壯哉兩君萬古無

嗚呼兩君萬古無

汝南行

將軍死綏君社稷炳烺義所不可惑青衣行酒豈能活
肉袒牽羊祗辱國初從貞祐棄燕雲赤氣半天開斗極
又絕西夏撤藩垣枝葉縱存無本實不問朔漠攻斬黃
敗盟要利增讎敵區區一道當數面賦稅重繁兵役急
宮闈意思踈骨肉陪貳從腴專雍塞比時久已當破滅
況復奔播何嗟及天興不是亡國主不幸遭逢真可惜

十年嗣位稱小康若比先朝少遺失汴梁不守大事去
黃陵潰散焉敢北險阻艱難氣益振照碧堂中親討賊
孤軍轉戰入汝南作氣蟠鋒轉深壁日夜望有勤王師
以廢為興賴忠力闕關誰意叛武仙感慨從為歎仲德
雙雞既盡麴屑空重圍益堅負戶汲池戰水涸還登陴
城墮斫樹埋卷柵空拳無皮短兵盡戰士嚼齒猶憤激
譙門闢碎鬪尤甚肉薄似墻當劍戟雖知力竭不可救
氣數儘窮心未畢慨然傳位誓衆死音彩凜凜不動色

一百餘年作天子與國俱亡在今日哀哉雉頭復自楚
將相血視不敢泣互為拏髻相割刀往往刎頸屍狼藉
須臾衆踣若崩山汝水不流波盡赤黑風裂天灰燼飛
紅雪亂擡深數尺島中自殺五百人義烈只數田橫客
何如國君死國臣死君數萬同死死所得還閒露布到
江南城南夾攻平汝南莫言解復九世讎三韓有靈應
益慚

金源十節士歌

金源氏播遷以來至于國亡得節義之士王剛忠公等十人皆死事死國有古烈士之風可以興起末俗振作貪懦其名字官階始終行業自有良史其大節之嶽嶽磊磊在人耳目雖耕夫販婦牛童馬走共能稱道者作歌以歌之庶幾揄揚激烈由其音節見其風采云天興諸臣國亡無史不能具官故皆祇以當世所稱者如郭哈瑪爾仲德行院等書之俟國史之出當為釐正云

王子明

讀書便學張復之手刃姦髡血寫詩幾回投筆重咨嗟
章句小儒安足為時危始作通州守賊臣遽獻居庸口
千羣鐵騎遶燕都玉輦倉皇下殿走孤城彈丸當畿甸
飲血登陴日酣戰晉明逗遛南八回拊髀張拳面迎箭
日暈忽破城無址失守何顏見天子朝服南向再拜畢
意色不動握節死詔為立祠謚剛忠稱道更有閑閑公
突兀義與廵遠同千載凜凜烈士風

伊勒都

金源大將重伊勒義烈膽勇絕世無涯注霜蹄誤一蹶
長萬忽中金僕姑思歸不忍遜逃去立功報效同關

關

雄猛已取左右忌姦兇叵測憂旦暮曹沫不免劫齊桓
賢王慷慨許送還聯鑣南下三千里義如子反與華元
負鑽梁園見天子猛士來師盡驚喜再賜節鉞還部曲
光彩騰騰滿旗尾獨當一面帥南陽誰知鬼蜮不可防
忽然羅織斬東市市人盡哭斛律光自壞長城撤棟梁

翦殘羽翮速滅亡嗚呼伊勒都可惜烈丈夫擊殺麒麟
跨塞驢却相布色將官奴

郭哈瑪爾

不援西夏棄燕都本根顛蹶藩籬踈不都長安都汴梁
為愛青屋能久長隴上豪山山西將憂國無言意惆悵
中興不居用武地君臣苟且吾何望郭公堂堂性忠勇
自拒洮河保秦鞏數年尚得建行臺金城堅牢華嶽聳
誰知自報小關捷總倚潼關為守阨渾將梁宋作龜茲

便視秦涼等吳越西州漸孤敵漸多四郊皆壘奈敵何
將軍百戰氣尤壯頭顱擲血為洗戈野無戰地始乘城
城傾堞圯接短兵先將妻子置草園坐束萬矢著死爭
鏃箬相銜如雨注敵人却走不敢顧繼弓入圍始自焚
飛矢出圍渾燎羽灰飛城陷力始竭賢王立祠稱壯烈
王師十萬下馬拜競擗馬鞭聲吐噤黃河都為苦淚流
隴山自此無顏色
戔戔大將節凜凜死國名英靈在天
為列星祇因汝南破滅時却從煙焰見天興臣自焚各

得死所古未聞

哈達平章

乘輿已播遷乾坤在孤注維時忠盡有哈達應敵東西
無定住職兼將相為國殫身繫安危如尚父賊國布色
深冒嫉小臣獻讒極諂附飛章誣陷罷兵柄幾把功臣
薦刀鋸子儀召入奉朝請彥章不用大事去事急復起
使迎敵即日上道無喜怒并命鏖戰來報捷每從中制
肘屢解曉關透漏幹腹出大河絕流兩軍接天欲亡人

不可為六合橫傾數丈雪人自為戰身伴僵空拳無皮
凍槍折人竭慷慨赴敵死死恨不能存社稷至今三峯
山白骨盡銜鐵老臣一片憂國心慘澹悲風與寒月

陳華善馬

陳侯膽勇絕世無也曾深入身陷敵一夕躍馬却南歸
追騎畏威不敢及入朝復使為大將鈴閣蕭然見襟量
征南素有春秋癖禮接士夫尤退讓深知敵情屢獻策
常談不用心怏怏憂國密坐時拊脾揮淚無言重惆悵

三峯失利還被執植立不拜尤憤激彼此皆帥敗則死
推碎兩脰終不屈臨終大呼茂奇爾豹死留皮在今日
壯哉國士當代無一死又勝伊勒都

烏克遜道原

金源國士多國人與國俱死皆大臣百年涵育重名義
况復舉是王室親中都失守有福興大梁當亡仲寧道
原尤有聲道原氣比二相直立朝凜凜盡忠赤京師根
本寄天下致力一死乃其職誰知崔立便反城豈能復

作褚淵生都堂一夜血浸屍瞳視國賊目不瞑家中復
有貞義女父死于君女死父跼戶懸梁義不辱罵賊投
繯有餘怒一門忠貞古未有名節俱全義不朽從今莫
薄金源士中原幾人能自守

仲德行院

士窮見節義國亂出忠勇仲德帝室胄虎文將家種儼
儼靜且深辨事不賴寵帝間彭城有逆節詔公密取不
敢泄臨行斬首挂馬鞍萬衆不謹皆妥帖仗鉞東南當

一面寇去看書寇來戰中樞大府無人聲儒將威名滿
淮甸甫臨秦鞏遮長安大軍失利三峯山徑穿敵壘數
千里乘輿已出空淚潛過門不入急赴難犯圍直向黃
河岸照碧堂空幸汝南敵臣新誅衛士散自古未有降
天子君臣血視付一死夫人徒步自援來命婦般礮自
我始夫婦死國無與伴至今聞者涕泗流

絳山奉御

田橫得士大都從死五百人島中悲歌天下聞天興君

臣數萬同日死自古得士誰得似至今汝水澀不流冤
波苦浪漂髑髏高官厚祿義當死裨將賤卒果誰使乃
知義烈能感激致命竭力無彼此幽蘭軒中自焚日宦
人乃有魏御直慨然正色責承御俱從煙焰火中入尚
衣奉御絳山奴殺馬毀玉如素克撥灰向敵葬主骨敵
人義之亦垂泣君不見漢唐閹豎徒紛紛刼制朝綱紊
宮闈英風突兀惟此君千載凜然應不泯

李豐亨

士為有用學有志終有為先生乃不幸一第當時危腐
儒苟且皆畏避奔走要門求內地趨趨冀得斗升祿覩
面祇為妻子計先生守官聽銓選不避畏途羞自便一
通誥命令城父即駕柴車出畿甸甫能到縣敵已至意
色不動即視事排牆拔樹為守禦馬嘶動地人鼎沸團
兵僅得二千人開門轉戰箭滿身見星塵出據大林人
蔽一樹氣益振弓折矢盡樹無枝重圍百匝何所依飲
血復鼓更格鬪揮戈慷慨拍落暉力竭衆斃付一死以

死報國真烈士君不見汴梁諸生不出門手把付身皆
餓死

李伯淵

天王出居委社稷城門不開人相食內外音塵俱斷絕
匝合長圍事尤急賊臣一夜忽為變舉城應敵遽傳箭
政事堂中誅二相部曲譙呼上前殿京城提控便稱王
鹵莽欲學張邦昌公然入宮辱妃嬪輒據御座著柘黃
伯淵忠壯賊黨畏飲泣無言重獻歎烏合不久相屠并

討賊誅讎在此際宮前古槐是獨柳馬上便梟崔立首
剖心灑血哭向天義氣凜凜古未有主人已亡國難興
讎耻既雪歸同盟不幸復遇襄陽潰一死兩朝全令名
常聞汴梁父老說當時不受江南節使亡儘可作純臣
金源義士第一人此是春秋責賢意但能殺敵都不計
況復去就死生皆得所英聲自足垂千古

題項王墓

黃公廟西穀城北哭兀一丘埋項籍誰知道傍幾抔土

却解銷沈拔山力天下苦秦又一秦天資好殺不好仁
古來鬪將皆莫及當時帝王自有真江東子弟亦良苦
本是亡秦却云楚不渡烏江亦天意免使東南為漢虜
時不利兮可奈何可憐壯士亦悲歌臨亡馬用幾行淚
倉皇灑向漢山河魯人仗節付一死葬王故用魯公禮
規模往往近三代天命宜歸赤帝子往年聞有沙丘士
掘牛致祭重流涕墓前作文哀項籍不知所哀竟何事
漢王入關無項王不王諸侯不殺降約法開關各罷兵

一伐大定武與湯漢王繞入項王來天下盡為狼與豺
嗚呼遺民端可哀項王宜怨不宜哀

靈泉行

乙卯秋八月及行臺嚴公獵于東山遂會于鳳山之
靈泉故賦二詩

赤雲夾日騰清暉太陰殺氣纏海電元戎小隊數百騎
金鑣玉勒紅牙旗長鞭一點陣偃月稍騎兩合前山圍
查牙折角獲麋鹿模糊生血禽孤羆霜蹄剝落落澗石

飢鷹亂掠秋草飛應弦霹靂疊破碎掇拾挂馬皆蟲豸
一川錯莫半山赭空穴破冢妖狐悲將軍推仁亦中怛
弛弓服矢收神威力士下馬各數獲從官解劍稱酒卮
山河慘澹生壯觀乾坤突兀增雄奇溶溶喜色動歸路
滿城樓觀重煙霏

蕭蕭弓劍秋山行老玉破碎前相迎石蛇遶徑入煙樹
一天忽在青山層三巖鼎峙勢欲墜元氣突兀强拄撐
相君坐定從官列游子乘興窮其登穿雲石磴上方遠

忽入洞窟行幽冥黑風吹衣出大隧泉源湛徹光泚清
脩然濺弄胸次豁一劑流盡千年醒憑高悠悠肆遐矚
天宇曠闊秋毫明泰山西來忽中斷巽巽桑土西南平
須臾過鼓震虛谷樽酒坐嘯還同傾醉歌扣碎一明月
欲入碧海騎長鯨

陵川集卷十一

欽定四庫全書薈要卷一萬六千一百二十八

集部

陵川集卷十二

元 郝經 撰

歌詩

彭城李師射虎行

僵林風色號驚鳥
山殘樹老虎負嵎
將軍躍馬翻雕弧
飛電一點金僕姑
赤羽飲肉血滿鬚
勁欲一撲垂霜顱
谷神不靈暗且愚
山靈憤死悲狸狐
十年一逕無樵蘇

一日便使為通衢虐政既草虎害除郡人吐哺為嗟吁
歸來猛氣慘不舒勇無所用將賈餘舉杯側坐紅氍毹
玉鞭擊碎青珊瑚意欲一舉開八區橐弓却馬還隆儒
作詩問君能從無當路先去入於菟

八月十五夜五河口觀月

去年燕南醉明月黃金臺上秋風發兩行燕玉笑姮娥
直著風神比顏色前年山南醉明月露氣風聲纏玉節
甲士搥鼓邊聲雄漢水波翻峴山裂今年又作江南行

五河河口澆雄鱸

字鯨本

舉杯對月月浮動酒浪搖碧金

鱗生彷徨四顧天宇豁九州四海一月明誰令此地限
南北閔起禍亂拏甲兵人生大抵隨所遇南北東西無
定住今宵對月傾金尊便可長吟嚼佳句醉時抱月凌
孤風桂苑煙霄快高步浩歌亂扣白玉盤天上人驚亦
何懼不須槌碎黃鶴樓何必翻倒鸚鵡洲大江江頭呼
李白我欲與汝蓬山游赤城城頭搖曳紫綺裘白雲雲
邊倒卷蒼玉甌雙成佐酒飛瓊唱不解人間更有愁

燭芝行

更長燭明對幽獨紫煙青焰噴赤粟燠為芝菌亂烟碎
莖葉輪囷花篤藪珊瑚小樹凝霞腴一片金沙襯紅玉
嗟嗟既以明自煎尚有精英結尤物江南江北富貴家
喜氣氤氲滿華屋高燒深夜照紅妝剪落煙花花更出
余方孤館交一臂兩國愁添兩眉蹙魚龍慘澹湖山昏
風雨飄蕭鬼神哭星芒錯落劍花澀慷慨歌謠動心曲
投戈散地三十年殘姓遺黎儘魚肉子亡其父婦亡夫

淚痕更甚銀盤燭不知此瑞胡為來奕奕層層生不足
祇應臘盡將回春再立元氣開乾坤發為陽和盟二君
億萬性命從今存金蓮夜對承主恩玉虹千丈纏朱門
照耀萬古光斯文與世作瑞垂後昆

書焦山瘞鶴銘後

江流赴海勢莫遏潮頭推山怒噴薄崩崖倒影浴朝日
金碧萬丈涵石脚右軍將軍筆如椽辟手窠大字銘瘞鶴
剗劃造化去畦町六合萬象歸旋斡烏活切意趣宛在結

繩前巧寓拙外無心學氣壓江海爭雄深飛動還疑地
軸弱年深石爛水波沸鱸鯢淬齒龍厲角書家元氣老
欲死濺沫掀濤半斑駁華表空存舊年月胎禽竟自翔
寥廓儀真館中三伴使攜來貽我襟宇豁墨粘紙濕帶
江霧神采超超勢沈著忽從滄海得遺珠舉目金牛已
割割乃知書法盡本此汴流求源各穿鑿惟餘魯公坡
仙得其正永州磨崖中興頌惠州李氏潛珍閣照耀萬
古傳脉絡何時摩挲斷石一樽酒揮灑江山卧煙壑坐

中還有打碑人直待今年秋水落

書磨崖碑後

書至於顏魯公魯公之書又至於中興頌故為書家
規矩準繩之大匠河朔嘗見三數本皆完好而森森
如劍戟有不可犯之色今得此本頗為殘缺既裝褙
則反得古中韻勝乃知崖角刻弊本真全露有李白
所謂秋水出芙蓉天然去雕飾者尤可賞激也乃為
賦詩云

汝南昔曾謁公祠
霜日皜冽森英姿
乃今江館坐牢落
奪目忽覩中興碑
神明煥若還舊觀
義烈凜凜生見之
滯氣激起天宇豁
快意發冢揮金鎚
生平每為二賢惜
以技掩節公義之
不阿桓溫止殷浩
遺世脫屣終游嬉
平原突兀杲卿死
李唐中憤公能持
政令二賢書不工
隻字片楮猶當奇
矧於超凡入聖筆
冠冕百代書家師
坡仙論書至公止
此本於公又其至
正筆冢玉藏李斯
出筆存鋒兼漢隸
古硬陵轢瘞鶴銘
韻勝韜挾蘭亭記

離堆雄峻僅能亞畫簪沉深還擲比書法至此為絕塵
頓覺諸家異端異恢宏正大極道緊馳騫剛方窮壯麗
萬古千秋討賊心二十四城忠義氣惜哉歲久頗殘缺
苔蝕潮吞寢磨滅去國幾年似者希滄海遺珠亦奇絕
酒酣對酌虎賁郎況乃摩挲是明月斷畫斬斬光斷金
倔彊常山筆端舌中間剝泐尚含胡慘澹中丞面餘巖
載看激裂壯士肝意苦時危將泣血置書勿論撫膺歎
更有何人似公節忠貞端不負巡遠文字尤令重元結

只今誰識段文昌世上馬知李希烈終南太華皆可磨
後人竟莫墮嵯峨惟餘浯溪青天一片石照耀遼古馳
江河誰能與世見此不朽業蕩攘邪穢蠲祲痾再立元
氣攄澆訛踵武至德肩元和九原起公吾其歌

江梅行

江城畫角吹吳霜破月著水天昏黃波澄煙晏林影澹
雙梅帶雪橫溪塘此時承平風物盛家家種玉栽琳瑯
朝來伴使晏江館銀瓶亂插吹銀管霏微香霧入紅袖

零亂春雲遶金盃都將和氣變荒寒錦瑟愁生燕玉煖
為言儀真梅最多苔花古樹深煙蘿一年十月至二月
紅紅白白盈江沱自從天馬飲江水草根鬪盡梅無柯
楊子人家楚三戶今年幸有燒殘樹忽聞星使議和來
盡貯筠籠待供具從今江梅好顏色爛醉長吟嚼佳句

江聲行

鴈啼月落揚子城東風送潮江有聲乾坤洶洶欲浮動
窓戶凜凜陰寒生昆陽百萬力一蹴齊呼合譟接短兵

鐵騎突起觸不周金山無根小孤傾起來看雨天星稀
疑有萬壑霜松鳴又如暴雨雷鬱鬱未發暗鳴水底號鯢鯨
祇應靈均與子胥沉恨鬱鬱怒猶難平更有萬古戰死骨
銜冤飲泣秋濤驚虛庭徙倚夜向晨重門擊柝無人行
三年江邊不見江聽此感激尤傷情須臾上江帆欲舉
舟子喧逐鬧過鼓江聲漸小聽雞聲慘澹芙蓉落疎雨

花藥夫人詞

青城費氏以才色入孟蜀宮後主嬖之效王建作宮

詞百首國亡入宋備太祖後宮嘗召使誦詩因誦亡
國詩云君王城上豎降旗妾在深宮那得知十四萬
人齊解甲寧無一箇是男兒子感其事故為作花藥
夫人詞

花藥夫人似花藥冰肌玉骨深宮裏等閒蜂蝶那得知
惜殺風流蜀天子芙蓉開滿摩訶池月殿香來動風水
廣寒却有兩姪娥鬢亂釵橫飄桂子自作宮詞一百首
學得晚唐王建體六宮寵愛渾一身太真飛燕親曾比

誰知一夜花開了子規啼向汴梁邸始知世上花藥多
一番春去空紅紫榻上真龍方鼾睡艷語新詞不到耳
向人更誦亡國詩爭妍忘盡降王恥十四萬人皆男兒
夫人宜向蜀宮死

二年冬至日湯安撫送梅

風吹雪霰日南至銀瓶又插真州梅塵封蠟顯春欲透
添水細浴清香回去年擬向西湖看今歲猶然揚子岸
燭花相對淡橫斜江靜天寒聽孤鴈

後聽角行

丁未冬十有一月漢上趙先生仁甫宿于余家之蛸
殼堂霜清月冷角聲寥亮乃作聽角行以贈其行近
在儀真每聞角聲因思向來卒章四句江上舊梅花
今夜落誰家樓頭有恨知何事牽住青空幾縷霞便
有江城羈留之兆故作後聽角行以自釋云

燕南壯士江城客孤館無眠心已折那堪夜夜聞角聲
怨曲悲涼更幽咽一噴牽殘楊柳風五更吹落梅花月

霜天裂却浮雲散鴈行斷盡疎星接餘音眇眇渡江去
依稀似向愁人說勸君且莫多歎嗟家人恨殺生離別
可憐辛苦為誰來凋盡朱顏頭半白萬緒千端都上心
一寸肝腸能幾截當時聽角送南人南人吹角不送人
不如睡著東風惡拍枕江聲總不聞

巧蟠梅行

金陵檻梅曲且紆松蕉翠箸相倚扶紫鱗強屈蟠桃枝
藤絲綴結費工夫白蕊紅萼玲瓏層玉錢亂貼青珊瑚

江石細嵌蒼蘚泥百巧直要似西湖盈盈矮矮密且疎
北客乍見忘羈孤聞說江南富貴家金漆洞房新畫爐
錦簾深垂春自生遶床羅列十數株清香透骨滿意濃
翠袖捧觴歌貫珠開殘不向前村尋送新易舊常有餘
細思只是兒童計不是詩人與梅意深江古岸三百樹
亂落潮溝遮野渡苔封雪漬硬剝青玉錐半開不開萬
里霜風吹犯寒燒酒傾數杯折殘戴了乘月回一天清
興詩家梅

電白馬行

余方丁年喜鞍馬費却千金總駕下忽從河壩得驥子
躍出驚湍汗流赭逸足追風名電白電掣騰空一片雪
幾回閒踏汴梁花半生快意燕山月身如膩玉不染塵
面無餘肉腕露筋不驕不惡穩且馴良馬可人如美人
顧盼徘徊會人意門巷街衢盡能記繫向垂楊立如睡
逍遙布路方半醉恒山堂北曾躍數文橋漢東事急一
踴上山椒臨危赴難每索轡兩耳直欲摩雲霄前年渡

江飲血鸚鵡洲今年朝天五千里金蓮花開却飲樂江
流忽從監牧羣中過大青小青盡回頭詔令持節南使
宋黃金臺前始解鞚儀真夜夜來入夢突兀使我心魄
動

長星行

甲子歲七月一日始
見九月十六日沒

銀槩萬條日沒西玉虹千丈月合丑雄雞一聲半天赤
太陽欲出星在柳東南勢妥裁冰刀東北迸開驅雪帚
行侵熒惑掩太白直從北斗向南斗上相黯慘忽無色

上將參差都不守明堂帝座總芒昧房駟王良欲奔走
漸過輿鬼漫兩河渾掃三垣當井口突煙滾滾欲浮動
異事驚人古未有初從曠旱忽風雨拔木轟山聲亂吼
爾後妖芒忽亘天七月初吉又踰九縱橫凌犯卧復堅
自暮至朝長更久五年江館戴片天變故紛紜翻覆手
摧心褫魄又見此閉目不敢窺戶牖天傾地裂由積釁
敗國亡家皆自取吾聞有道必得壽長星勸汝一杯酒
入奏行贈千戶魏斌

天王推恩下寶書龍節玉幣金虎符邊臣喜兵禍二國
陰使豎子來相圖七年姦兇緘髓骨故作狼跼期一撲
朦人救死趨夜發羣起先尸帳下督拔柵登門強斬關
直入卧內殺長官洶湧逆氣噴信函模糊生血撼帳竿
魏斌慷慨掉臂入舉頭為城令避賊抱書登墉性命存
黑風卷地飛沙石賊徒駭亂各散走館吏嚴兵擁前後
倉皇國士幾委地再活還因此人手人心事急方可見
平日相看祇見面只今歸國俱入見為君草奏黃金殿

整頓腰間大羽箭討賊誅讎為一戰

鬻粟行

昔年燕都賢豪宴我百花樓張觥合吹逞絕藝象花短
管安蘆頭主人捧觴初壽客一聲便作新涼州傾側四
座皆寂默清冽揭起嘶蒼虬漸為怨曲淒且幽更有珠
席翠袖揄音赴節轉驚喑宛如饑鳳來求凰碎挑銀字
眉黛羞有時亂敲檀板忽惆悵渾似薊門桑葉秋軒昂
悲壯多感激有客淚滿紫綺裘幾年南來坐江館但聞

江城畫角聲悠悠
昨宵花落啼杜鵑
月窗孤影生離憂
誰家夜把鬢栗吹
一噴新聲喚舊愁
宿如深江一葉舟
高如楊花春不收
忽然拚過成百折
低昂頓挫如有求
一絲解將心緒抽
掛向燕山新月鉤
無情漫激壯士肝
中夜坐起涕泗流

狼牆歎

危牆閣峻倒插棘
四簷抵匝無罅隙
東日曬透西日炙
周興鐵釜熾火逼
置予此中不許出
虐哉狼牆甚狼石

嗚呼何時見天日

冤鑄歎

重門重鎖禁不開
伴使送入不復來
鐵簧生澀深金苔
冷氣纏結埋陰霾
竇中進食當門回
咬唇閉目猶疑猜
嗚呼冤鑄孰為哀

憶寶刀歌

生平知己壓腕刀
借交報仇燕南豪
一從濠梁成隔絕
梟獍觸忤狐狸嘍
夜夜斗牛多異氣
玉虹縈天光燭地

幾回夢裏飛入手痛惜當年都廢棄近來館下遇家賊
空拳無奈徒忿激撼牀一夜寶刀鳴黑風卷地吹霹靂
只今使節猶未回祇應玉琤生青苔何時磊落却在手
為我討賊除氛埃

陽春怨

去年春歸花滿空今年無花酒樽空起來牆頭望歸鴻
却見花落千片紅劉郎劉郎怨東風武陵桃源一夢中
西樓畫角東寺鐘深閨月落昏簾櫳美人美人隔江水

流年暗逐江水東

江頭怕見楊柳春
楊花飛來愁殺人
紅顏落盡花片新
黃昏無人淚霑巾
舊花被疊凝春塵
夢中忽見渾未真
隔花半面春山顰
恨郎不歸多怨嗔
不知兩處同苦辛
同是天涯愁恨人
幾年心事向誰說
花落鶯啼晝掩門
別時重約頻付書
一字不到八年餘
死耶生耶漫嗟吁
是耶非耶有還無
應言被郎誤殺余
豈知郎在空牀居
春風滿簾酒滿壺
落紅零亂飄庭除
不言不飲愁恨俱

半睡不睡情緒無杜鵑啼落桃花月紅燭無情泣座隅
芳草淒淒春又青階前院後喚愁生隔牆飛花帶鶯聲
都因無情却有情強飲不醉愁難醒欲睡不著夢難成
一簾斜日堆綠英春風澹沲江無聲楊花茫茫揚子城
總是天涯流落情夜來說殺梁間燕一世春愁在此行
長歌行為正甫書狀壽

髯公子聽我歌歌聲苦長奈若何窮天亘地怨不盡顧
視萬古都蹉跎借問怨何事怨我與子久在江之沱嗟

子之才世豈多琮璜
潤琢且磨圭珽特達正不頗宜
在巖廊奉璋莪紫霄絳雲白玉珂翠蕤孔蓋金錯摩
論達唐虞開太和災元磊落不媿阿高風颼颼吹明河
秋天水鑑冷不波六合表裏盡清徹世塵不到更把佳
句哦誰知一旦雜黽蛙翻風豫章薦女蘿所以歌聲長
與子斲沉痾子居河陽縣我住陵川頂子方丁年我知
命龍文虎氣心炯炯大才自古多抑塞會當拔起快馳
騁金樽滿浸太行影黃河倒卷入天井門前大江流幾

度秋風吹我歌聲正長莫嘆猶未歸壯節嶢天虹貫日
志士豈作兒女悲

丁卯冬十二月二十八日修易外傳畢記夢

君子道長及夫決聖筆無麟義當絕尋終究尾動精爽
黑日入夢寒滿魄頑冰瑩徹轉車輪陰鑑水深嵌屋壁
山東日月忽分曜一線微光變痕迹兩手摩挲冷逼心
恍然記悟祇一易韋編斷後二千年故紙紛紛壅南極
却從孤館學螭魚自笑虬浮不量力雕鏤太極百萬言

破碎乾坤裂肝膽大江粘天硯滴乾風雨滿窓真宰泣
邵先生程夫子是聖人能不死平地重成五鳳樓精義
入神還有此

補遺

依顧俠君元
詩選本增入

太平頂讀秦碑

岱宗太平頂磨崖與天齊左列則天頌右刻張說辭文
采與書法不離近代規漢封宛在周觀東秦壇亶出絕
頂西壇前圓平值中峯突兀上有始皇碑年深雨漬百

裂餘析作兩峯蹲半規
面陽數字仍可辨隙縫重銜苔
蘚皮中間隱約見制可完好可辨
惟臣斯拳如釵股直
如筋屈鐵碾玉秀且奇
千年瘦勁益飛動迴視諸家肥
更癡當時風雨有餘怒
豈容夸石獨在茲祇應神明愛
尤物不肯轟擊常護持
昔年韓文公曾賦岵嶺詩字青
石赤皆傳聞漫為咨嗟涕漣沔
何如親登泰山日觀峯
光怪特見絳氣纏金虹
摩挲細讀秦相碑天門高咏來
清風乃知山靈不相負
夜宿天邊不忍去醉倚雲窓重

回顧

陵川集卷十二